

ASO LUA, 2 IULAI 2019

Na nofoia e le Fofoga Fetalai le Nofoa i le itula e 9:19 i le taeao.

Tatalo.

FOFOGA FETALAI: Ou te faasilasila atu ua toe amatalia Tualumaga ma Galuega a le Fono Aoao Faitulafono.

Avea lenei avanoa e faatalofa atu ai ma le agaga faaaloalo i le paia o le Palemene, afio o lau Afioga i le Palemia faapea foi lau Afioga i le Sui Palemia ma le mamalu o le Kapeneta, ae a Taitaifono ma sui usufono mamalu o le Palemene faapea foi Minisita Lagolago, Ofisa Sili o Pulega o Matagaluega ma Faalapotopotoga a le Malo, aemaise foi le tapuai faafogafoga mai o Samoa.

MALELEGA MAI LE AO O LE MALO

“TUSI mo:

Le Fofoga Fetalai:

E tusa ai ma le Mataupu 59 o le Faavae o le Malo Tutoatasi o Samoa, ua ou tuuina atu nei le maliega i le Fono Aoao Faitulafono na te iloiloaina ai le Tulafono Tau Faaofi ua faalia iinei:

1. Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu 2019.

TUUIINA ATU i lou nei Lima i lenei aso 1 o Iulai 2019.

Tuimalealiifano Vaaletoa Sualauvi II
O LE AO O LE MALO

FAAALIGA MAI LE TAITAI O LE MAOTA

E tusa ai ma le Tulafono Tumau 100(2), ua tuuina atu nei le Faaaliga i le Fono Aoaofaitulafono mo le iloiloina o le Tulafono Tau Faaofi ua taua i lona **Tulaga Faanatinati**.

1. Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu 2019.

TUUIA ATU i lenei aso 1 o Iulai i le tausaga 2019.

Hon TUILAEP Dr. Sailele Malielega
TAITAI O LE MAOTA

**TULAFONO TAU FAAOFI O TEUTEUGA O LE TULAFONO O FUA
FAATATAU O LAFOGA O OLOA E GAOSIA I LE ATUNUU 2019 –
faitauga muamua**

FOFOGA FETALAI: Ou te tapa ma le faaaloalo lau Afioga i le Minisita mo Tupe Maua.

Afioga Hon TIALAVEA FEA LENIU TIONISIO HUNT (Minisita mo Tupe Maua): Faafetai i lau Afioga i le Fofoga Fetalai mo le avanoa. E talitonu tatou te piama faatasi i le taulaga molia i lenei taeao i lau Afioga. E faatalofa atu i lau Afioga, aemaise foi le Afioga i le Palemia ma le paia o le Kapeneta, Minisita Lagologo, Taitaifono ma Sui Taitaifono o Komiti taitasi aemaise foi le afifio mai o Ofisa Sili o Pulega o Matagaluga ma Faalapotopotoga a le Malo aemaise o le tatou atunuu o lo o faafogafoga mai.

Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu 2019 i lona faitauga muamua.*

Faaluaina e le Minisita o Tupe ma le Minisita mo le Soifua Maloloina.

Na faamaonia le lafo ma faitauina le Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu 2019 i lona faitauga muamua.

FOFOGA FETALAI: Talu ai ua ou taulimaina nei le Tusi Faamaonia o le Tulaga Faanatinati ua maea ona sainia i le Tulafono Tau Faaofi, o lea o le a sagai atu loa le Fono Aoaofaitulafono mo le faitauga faalua ma le faagasologa ai o le faitauga faatolu.

**TULAFONO TAU FAAOFI O TEUTEUGA O LE TULAFONO O FUA
FAATATAU O LAFOGA O OLOA E GAOSIA
I LE ATUNUU 2019 – faitauga faalua**

FOFOGA FETALAI: Ou te tapa ma le faaaloalo lau Afioga i le Minisita mo Tupe Maua.

Afioga Hon TIALAVEA FEA LENIU TIONISIO HUNT: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu 2019 i lona faitauga faalua ma ou te fia tautala faamalamalama i ai.*

Faaluaina e le Minisita o Tupe, Minisita mo Aoga, Taaloga ma Aganuu ma le Minisita mo le Soifua Maloloina.

Afioga Hon TIALAVEA FEA LENIU TIONISIO HUNT: Faafetai i lau Afioga i le Fofoga Fetalai aemaise le paia o le Palemene, o le Tulafono Tau Faaofi lenei, o lo o taumafai e teuteuina faamatalaga o le Tulafono Tau Faaofi o Fua Faatatau o Lafoga o Oloa i le Atunuu 1984, e ala i le suia o fua faatatau ma faasologa o tiute mo nisi mea taitasi faapitoa i fua faatatau fou o le faasologa o tiute. O le sini o le Tulafono Tau Faaofi, ia aiaia ai mo le fua faatatau o lafoga oloa e gaosia i le atunuu mo le ava malosi e aofia ai le sili atu i lo le 40% ma ia faaitiitia ai, o le fua faatatau o lafoga o oloa e gaosia i le atunuu mo le ava malosi e aofia ai e itiiti ifo i le 40% faatasi ai ma le siitaga e tai 10% o le lafoga o oloa e gaosi ia Iulai 2019 e oo ia Iulai 2021.

O le faamoemoega lava lau Afioga i le Tulafono lenei, ona o le talosaga na tuuina mai e le Chamber faatasi ai ma le au gaosi ava malosi i le atunuu, ina ia toe tagai le Malo i le teuteuga o le Tulafono ona o le aafiaga o latou pisinisi ma latou galuega fai, ua tapunipuni nisi o fale gaosi ava. O le faamoemoega pe mafai ona toe fesuisui ai le Tulafono aemaise le excise tax ia siisii i tausaga e tolu.

O le auga tonu lava lena o le Tulafono Tau Faaofi lau Afioga i le Fofoga Fetalai.

FOFOGA FETALAI: Malo faafetai.

Na faamaonia le lafo ma faitauina le Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu 2019 i lona faitauga faalua.

**TULAFONO TAU FAAOFI O TEUTEUGA O LE TULAFONO O FUA
FAATATAU O LAFOGA O OLOA E GAOSIA I LE ATUNUU 2019 –
iloiloga auiliili**

FOFOGA FETALAI: E tusa ai ma Tulafono Tumau e amata le iloiloga auiliili i le fuaiupu 2.

FUAIUPU 2: Ua teuteuina le Faamatalaga.

Tofa LEALAILEPULE RIMONI AIAFI (Faleata Sisifo): Lau Afioga i le Fofoga Fetalai, o le Fuaiupu 2 faamolemole fia fesili i ai faamolemole... Le schedule.

FOFOGA FETALAI: Se i tuu atu pea le avanoa lau Afioga i le sui usufono mo Faleata.

Tofa LEALAILEPULE RIMONI AIAFI: Ou te fia fesili atu lava lau Afioga, faafetai mo le avanoa i le Afioga i le Minisita, ona o lea e foliga mai e alu i lalo le excise tax o fagu malosi, ae alu i luga le excise tax o le pia, a o le mea lea o lea e tele lona gaosia i totonu o Samoa nei.

O le isi mea, e pei o lea e foliga mai e tutusa le excise tax o le pia lea maualalo le pasene ma le pia e maualuga le pasene. Ae sa tatau ona taumafai foi lea e faamalosi le gaosia o pia ia e laitiiti le pasene (alcohol volume). O lea e fia fesili atu ai i lau Afioga i le Minisita, po o le a le mafuaaga e alu ai i lalo le excise tax o mea malosi ae alu i luga le excise tax o pia. Ma le faaaloalo lava.

FOFOGA FETALAI: Se i tulai mai le Minisita e ana le Tulafono Tau Faaofi.

Afioga Hon TIALAVEA FEA LENIU TIONISIO HUNT: Faafetai mo le faafesili a le sui usufono mamalu. O le excise o le fagu malosi o lo o i ai i le taimi lenei sa siitia i le tausaga talu ai i le 100%, sii mai i lalo i le \$19 ma le \$12 i le \$38.60. E tasi lava le excise rate sa i ai. I le talosaga la na toe tuu atu i le Matagaluega e uiga ... pe mafai ona toe fetuunai le tariff lea ina ia siisii malie i le tai tolu tausaga, siisii tai 10%. O lea la na suesue ai e le Matagaluega faatasi ai ma le Chamber ma pasia ai e le Revenue Board e tatau ona toe fetuunai le tulaga lea ma o lea ua aumai ai le Tulafono. O le pia lena e 3% le siitaga. O le pia i lalo o le 3%, o lena e \$3.08 pe a sii nei le 3% \$3.17. A oo i le tausaga fou ua \$3.27 i le 2021, e \$3.37 o lena foi ua faavasega mai i le Tulafono lea le pia, a alu atu le pia lea e 3% i le 7%, o rates na e alu ai. A o le ova atu i le 7.1% le isi pia e tau i luga, po o le a le malosi e i ai, o lena ua fai ai le isi laina fou lena e \$5 i le lita le excise tax. A oo foi la i le tausaga fou, ua \$5.15, oo i le 2021, e \$5.30. O lena ua faavasega i ina le malosi o pia. O le taimi nei, o le pia malosi lea e i ai o le taula, e 7% faapena foi ma le vailima o lo o gata ai le malosi o le pia. O lea la ua fetuunai ai i ina, a toe sau se isi e produce se pia i luga atu o le 7% o lo o i ai o le kalifa(tariff) fou la lena e alu ai o le \$5 ma faasolosolo atu ai i luga.

Lau Afioga, o le tali atu lena i le fesili.

FOFOGA FETALAI: Malo faafetai.

Faamaonia le Fuaiupu 2.

FUAIUPU 1 MA LE IGOA:

FUAIUPU 1: Igoa puupuu ma le amataga.

IGOA: Teuteuga o le Tulafono o Fua Faatatau o Lafoga o Oloa e Gaosia i le Atunuu 2019.

Faamaonia.

Na faagasolo le Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu 2019 e aunoa ma se Teuteuga.

**TULAFONO TAU FAAOFI O TEUTEUGA O LE TULAFONO O FUA
FAATATAU O LAFOGA O OLOA E GAOSIA I LE ATUNUU 2019 –
faitauga faatolu**

FOFOGA FETALAI: Tulai mai lau Afioga i le Minisita mo Tupe Maua.

Afioga Hon TIALAVEA FEA LENIU TIONISIO HUNT: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu 2019 i lona faitauga faatolu.*

Faaluaina e le Minisita mo le Soifua Maloloina ma le Minisita o Tupe.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoaofaitulafono.

**ILOILOGA O LE LIPOTI A LE KOMITI SUESUE FAAPITOA A LE
PALEMENE MA PEPA O LE SAUNOAGA FAA-MINISITA A LE
AFIOGA I LE PALEMIA O LE ASO 28 ME 2019**

- 1. P.P.2019/2020 Nu. 87, Saunoaga Faa-Minisita a le Afioga i le Palemia, Susuga Hon Tuilaepa Dr. Sailele Malielegaoi i le aso 28 Me 2019, e faatatau i le mataupu o le Faamasinoga o le Peresetene o Fanua ma Suafa.**
- 2. P.P.2019/2020 Nu.86, Lipoti a le Komiti Suesue Faapitua a le Palemene e faatatau i le Faaiuga a le Komisi o Auaunaga Tau Faamasinoga, ma aiaiga o le mataupu 68(5) o le Faavae o le Malo Tutoatasi o Samoa.**

FOFOGA FETALAI: A o le i tulai mai le Taitaifono o le Komiti Suesue Faapitua a le Palemene, ou te muai tapa lau Afioga i le Palemia mo sau saunoaga.

**Susuga Hon TUILAEPA AUUEA FATIALOFA LUPESOLIAI
LOLOFIETELE NEIOTI AIONO GALUMALEMANA Dr. SAILELE**

MALIELEGAOI: Lau Afioga i le Fofoga Fetalai ma le mamalu o sui usufono o le Fono Aoaofaitulafono. Ou te faatalofa atu i le maleifua mai i le soifua lelei ma le lagi e mama i lenei taeao fou, malo ua maua.

Ua le o toe maloafua lo tatou taeao laulua fesilasilafai. Ua tatou agai atu nei e tagofia le mataupu o se mataupu iloga ua i lumamea, o le faamutaina lea o le tofiga o le Peresetene o le Faamasinoga o Fanua ma Suafa. E faapei ona faia i ai le faaiuga a le Komisi o Auaunaga o le Faamasinoga, ina ua maea ai le iuga o Faamasinoga o Talosaga.

Sa tuuina atu le mataupu lenei e soalaupule e le Komiti faapitoa a le Palemene ona toe lipoti mai ai lea mo se faaiuga faaiu, e faia e a outou afioga o sui usufono o le Fono Aoaofaitulafono lenei e ala i le Palota. Ina ua lava lea o le avanoa e tatou te faitau maeaea, ma toe faitau ma saga faitau, ina ia malamalama lelei ai, ma tatou tau fai mafaufau loloto uma i ai lava i lenei mataupu ogaoga, ma le aafiaga o lenei foi itutino o lo o tagofia ma soalaupule tulaga uma o le Faamasinoga tonu ma sao, e ono aafia ai le filemu ma le soifua saogalemu o tagata lautele. Ae a le silafaga a le Atua Silisili Ese o lo o faavae ai le Malo lenei o Samoa, faapea foi le tagai malamalama o tatou paaga o lo o lagolago mai ia tatou taumafaiga uma mo le atinae lautele o Samoa, ma lo tatou soifua ai i le malupuipua ma le tausisia o ala o le Tulafono. E le gata i lea o le matau mai foi o Taitai o Samoa, o tatou Itumalo na filifilia i tatou, tatou te o mai e soalaupule mataupu uma lava, e faataoto i totonu o le Palemene lenei, ina ia matua tuutuu loloto i ai la outou tofa ma le faautaga oooo.

O se uluai taimi foi lenei i le Tala Faasolopito, o upu fai o le Malo lenei ua oo mai ai se mataupu faapenei, ua matua nofo manino ai le atunuu o faafogafoga mai. O le Palemene lenei, e faia le faaiuga e faamuta ai se Alii Faamasino. Ua le faia se amioga e talafeagai ma le mamalu o le Faamasinoga. O le Maota foi lenei na te faia foi le faaiuga e faamuta ai se Palemia po o se Fofoga Fetalai, pe afai ua faia se solitulafono ogaoga ua le talafeagai, ma le mamalu o le tauaveina o nei tofi. Ma e atagia ai i le taeao lenei le uiga moni o le upu o le Fono Aoaofaitulafono a Samoa. E tatou te faia Tulafono ma e tausolomua foi ia i tatou ona l solia Tulafono.

Ua outou tauaaoina kopi o lau tautalaga Faa-Minisita, sa ou ototoina atu ai moliaga o le Peresetene na fofogaina e le Faamasinoga faa-Itumalo, le Faamasinoga Maua-luga ma le Faamasinoga o Talosaga, e tolu faamasinoga na lotea. O le faaiuga a le Faamasinoga o Talosaga, na faasalaina ai le Peresetene i se sala tupe tele, ona i le vaai taulai faale-Faamasinoga e matuia tele le moliaga, o le faaoolima mataga i se tasi o le aufaigaluega, o se amio paaa ma le tautamalii i se alii Faamasino, ua le tusa ai ma lona tofiga.

Ma i aiaiga o le Faavae i lalo o le fuaiupu 68(5), e lua auala ogaoga e faamuta ai le tofiga o se faamasino. Muamua, ua ia faia se amio paaa e le talafeagai ma le mamalu o le tofi Faamasino. Lua, ua faaletonu le mafaufau. E manino lelei aiaiga o le fuaiupu 68(5) o le Tulafono Faavae o lo o faavae ai le Malo lenei. E faasino lea i le ausia o le 2/3 o le aofai o sui usufono o le Maota lenei. O lo o ua faamalolo le tumau nei le Peresetene e Le Ao Mamalu o lo tatou Malo, e talia ai se faaiuga a le Maota lenei ona faatoa faia ai lea o se faaiuga o lenei mataupu. Ma e le na o Samoa ua tupu ai mea faapenei, e tupu foi i isi Malo, o lo o faafoe i faiga

faatemokarasi. E pei o Ausetalia e aafia ai foi Faamasino i le tulaga lava lea, o le fesiligia o le amio pulea.

Lau Afioga i le Fofoga Fetalai, ina ia ogatasi le agaga o lo o faataoto mai e le fuaiupu 68(5) o le Faavae ma se lafo e faia i le mataupu lenei. E ao ai ona ogatasi upu ma le lafo ma le faaupuga o le Faavae. Ma o le lafo ou te faatuina atu e fai i ai le faaiuga manino a le Palemene lenei, *Ina ia faamalolo le Peresetene o Fanua ma Suafa ona o tulaga o amioga le talafeagai ma faiga faavae i moliaga ua faamaonia*. O le lafo lena lau Afioga i le Fofoga Fetalai mo le faamaonia i se Palota e faia e le Palemene lenei.

A o le i agai atu le Palemene mo le tagofiaina o le lafo, e fia fai lava sina au upu puupuu i le Lipoti a le Komiti Faapitoa Filifilia a le Palemene e faasino i le mataupu o le Palota o le sui usufono e tusa ai ma lana faamasinoga o le faatofalaiga tatau. I se isi faaupuga faigofie i lona lava aia tatau o ia o le sui usufono, o le Vaega Faaupufai lenei, o lo o tu i le foe o Faigamalo a Samoa, o lona faalupega o le Vaega e Puipuia Aia Tatau a Tagata. Aia Tatau Faavaega Faaupufai, po o le aia tatau foi a sui usufono o le Vaega lenei o le HRPP. Talu mai ona tulai mai le HRPP e faafoe le Malo, ua faaalii ai i totonu o le Palemene lenei, le Palota e mulimulitaia ai aia tatau faavaega Faaupufai, ua i ai foi le laolao na faaalii ai le puipuia o aia tatau faa-sui usufono o le faafaletui o sui usufono o le HRPP.

Mo sina faataitaiga i le Paeaiga o le 1988, i le 1990, na pasia ai e le Palemene lenei le Tulafono o Petipetiga. E 17 palota e lagolagoina le Tulafono, o lau Tulafono o au o le Minisita o Tupe i lena vaitaimi. Na matou palota ai ma isi sui usufono o le HRPP. E 16 na tetee, na aofia ai ma le Palemia le afioga ia Tofilau Eti Alesana, e 16 e tetee. E ese le palota a le Palemia, ese le palota a le sui Palemia ma isi o le HRPP. O aga na faa-HRPP e oo loa ina tatala le palota, e le toe tilotilo lava se isi i le mea e palota ai le Taitai, ae fai lava lana aia tatau. O le Tulafono lena lea na pasia i le palota e tasi, na maualafia ai le faagasologa o le Lotto Samoa, Tattslotto, mulimuli ane ai, faigofie ai foi ona faamaonia ma le Tulafono o lo o faagasolo ai nei le Kasino. O mea ia sa faaaoga i ai Faiga Faavae nei a le Vaega Faaupufai. E tasi lava le palota a sui o le HRPP na sao ai nei taaloga tau petipetiga.

I le Paeaiga talu ai, na palota ai foi sui usufono mamalu o le HRPP faaia-tatau faavaega o le HRPP le Tulafono, o le toe fetuutuunai o tuaoi faa-Itumalo. O le palota lea na amata ai ma le sui usufono e toatasi na palota ese, le Afioga i le sui usufono mo Gagaifomauga Nu 3, e ui o le isi lea sui usufono Sinia o le vaega lenei sa umia le tofi o le Fofoga Fetalai, umia foi le tofi o le Minisita o le Kapeneta. Ae oo loa ina lotea faiga faavae, na tulai mai ai le HRPP e le toe tilotilo lava itu i Sasae po o le itu i Sisifo.

Ua ou taua ia itu, ona ua laa le Komiti Faapitoa a le Palemene, i se mataupu e le aiaina e se Komiti a le Palemene. O se mataupu e faapitoa, i le aiatatau a Vaega Faaupufai. O le lape lena o le mataupu a le Komiti na tofia e silasila i le mataupu lenei ma toe lipoti mai i totonu o le Palemene, e tatau ona ou faaleoina.

Lau Afioga i le Fofoga Fetalai ma sui usufono mamalu o le Maota lenei, e le tau faatonuina e le matapia le manaia. E le faatonuina foi e Laupua Tamafaiga. O le Maota lenei, o le Maota o lo o ee ai Taitai o Samoa o Tupu ma Ee o Samoa i ona tulaga faalupe aua le Paia o Aiga ma a Latou Tama, faapea foi le Usoga a Tumua

ma Puleono i Salafai. Ua saofafai i totonu o le Fonousu lenei a le atunuu, o sui o nuu latou te faatonutonu taiala o le nofo lelei i le filemu ma le amio pulea o tagata uma o le nuu o lo o i ina le tofa fetalai ma le utauta mamao.

O a outou afioga foi o sui usufono o le Palemene lenei, o lo o tofia nisi o tofiga maualuluga i totonu o Ekalesia Kerisiano, tou te malamalama lelei ai foi, i aoaoga a lo tatou Alii, i le faia lea o le faamasinoga tonu. O isi afioga taua lava, mai i le Tusi Paia e taua tele mo le faiga filifiliga i le taeao nei. ***“O le na te iloa le mea e tatau ona fai ae e le faia, o le agasala lea i luma o le Silisili Ese”***.

E faavae le talitonuga maumauai o lo o i le Maota nei le utu a le fai mea, ua tasi ai le tau i le Vaega Faaupufai lenei o le HRPP, e tusa ai ma ana faiga faavae, fetuutuunai ua tausaga, o le a tatala le palota, e maua ai le avanoa e faaleo ai finagalo o sui usufono, o sui usufono o le Vaega Faaupufai lenei, e faaalua ai o latou finagalo, e ala i la outou palota. O le sao lava lea a outou itumalo i le mataupu ogaoga ua i lumamea o le Palemene, o le a fai i ai le tatou faaiuga.

Soifua ma ia manuia lo tatou taeao.

FOFOGA FETALAI: Malo faafetai, ia se i tulai lau Afioga i le Sui Palemia.

Afioga Hon FIAME NAOMI MATAAFA (Sui Palemia): Lau Afioga i le Fofoga Fetalai ou te tulai atu e faaluaina le lafo e pei ona saunoa i ai le Afioga i le Taitai o le Malo i lenei taeao. Atonu o lea ua manino foi le mataupu e agai i ai le felafolafoaiga a le Maota i lenei taeao, aemaise foi o lea ua taatia le Lipoti a le Komiti a le Palemene sa tuuina i ai le mataupu e tapena mai i ai se latou fautuaga.

Lau Afioga i le Fofoga Fetalai, i le faaluaina o le lafo a le Afioga i le Palemia, ou te talitonu, ia te au lava ia, ua ou fiafia ona o lea ua tulaga faatasi le lafo ua faataatia i lenei taeao, ma aiaiga o le Faavae i le mataupu lea e 68 (5). Sa i ai lava le atugaluga i le taofi lau Afioga, a le tonu le faatulagaina o le lafo a le Malo, e ono faaletonu foi le faagaioiga o le tatou mataupu lenei. E aliali le lafo i le mea ua taoto i ai le finagalo o le Malo, i lou Tootoo o au o le sui o le Kapeneta, ou te faafetai o lea ua toe faatulaga le lafo, ma e pei ona ou tauina atu, ou te faaluaina le lafo a le Afioga i le Palemia.

FOFOGA FETALAI: Malo, ua faafofoga le paia o le Palemene o lea ua faatuina mai le lafo e le Palemia ma ua faapena ona faaluaina e le Afioga i le Sui Palemia. O lea foi ua maea ona saunoa le Afioga i le Palemia e tusa ai o le mataupu o lea ua talanoaina i le Fonotaga.

Afioga Tafua Maluelue Tafua: Lau Afioga i le Fofoga Fetalai...

FOFOGA FETALAI: O lea foi ou te... E i ai le manatu... malie le sui usufono mamalu alaala mai i lalo o lea e fai le faamatalaga a le Fofoga Fetalai. Ou te manatu o le avanoa lelei lea mo le... tapa ai ma le faaaloalo lau Afioga i le Taitaifono o le Komiti Suesue Faapitoa a le Palemene, e tulai mai.

Tofa NAFOITOA TALAIMANU KETI (Taitaifono o le Komiti Suesue Faapitoa a le Palemene): Lau Afioga i le Fofoga Fetalai, ou te tulai e faatu le

lafo, *Ina ia faautagia e le Fono Aoa le Lipoti a le Komiti o lo o tuuina atu ai ana SAILIILIGA MA FAUTUAGA, ma ou te fia tautala i ai.*

Faaluaina e le Sui Usufono mo Lefaga ma le Sui Usufono mo Falealili Sasae.

FOFOGA FETALAI: Ia, ou te tapa lau Afioga i le Taitaifono o le Komiti Faapitoa e tulai mai e saunoa i sailiiliga ma le aotelega o fautuaga.

Tofa NAFOITOA TALAIMANU KETI: Lau Afioga i le Fofoga Fetalai, ou te manatu o lea ua logologoa le moega o uputuu o le loaloa ma le Tiavavau, ua maea foi ona e sala upu ma paia o le Maota e pei o le upu e fai ia Loo ma Loo. Na ou lagona lea, ou te le toe utuvai lepulepu la i ai, ae o le a ou utuvai loaloa e pei o le upu e fai i le folauga a le alii Toga, aua e i ai lou talitonuga, ua tatou feiloai a ua i alo e pei o le tala e fai i le tei o tupua, i le alofa ma le agalelei o le Atua.

E le alu loa ai se faamatalaga a lenei Komiti faatauavaa. E ao ona afe ma o matou faafeiloai atu i le ee mai o le Nofoa, lau Afioga i le Fofoga Fetalai, lau Afioga i le Palemia o le Taitai o le Maota, lau Afioga i le Sui Palemia, le paia o le aiga Kapeneta, a outou Afioga i Sui Minisita. E faapea foi lea itu o le Maota i le affio o a outou Afioga, Taitaifono o Komiti Faa-Palemene, Sui Taitaifono, aemaise o sui usufono mamalu uma o le Palemene o le Malo Tutoatasi o Samoa. E ofo alofa ma faafeiloai atu i le paia maualuga i tupu ma ee o le atunuu o Ofisa Sili o Pulega o Matagaluega a le Malo, e faapea foi Faalapotopotoga Tumaoti. E afe foi sa matou faamatalaga i lau Susuga i le Resitara ma le Ofisa o le Fono Aoa Faitulafono, i lo outou gapatia aua le tautuaina o le Maota, ua leva ona faaaaogagase.

Ae e le galo foi sa matou faafeiloai i le tapuaiga mamalu a Samoa, faafogafoga mai a lau Afioga i Le Ao Mamalu o le Malo ma lau Masiofo, Afioga i le Fono a Sui Tofia ma Faletua, faapea foi le paia o le Faamasinoga, le Sui Faamasino Sili, Alii ma Tamaitai o le Faamasinoga, ma le Ofisa o le Faamasinoga Samoa mai le Matafanua seia oo lava i le Siuafanua, matou te ofo alofa ma faatalofa atu.

Tulai ma le agaga faaaloalo i lau Afioga i le Fofoga Fetalai, e fia fai se tala e uiga i le Lipoti Komisi Faapitoa a le Palemene, lea ua taoto nei i le Maota. Ou te manatu ua manino auofala, aua o lea ua taoto i le Maota lenei aemaise le faafogafoga taputapu mai a le atunuu, i ona tafa e fia, Samoa nei ma atunuu i fafo. O le saunoaga faa-Minisita a le Taitai o le Malo, le Afioga i le Palemia, e pei ona faamaonia e le Palemene i le pepa a le Palemene 2019/2020 nu.87.

O le mataupu ua i luma nei o le Maota, e pei ona outou faafogafoga i ai, o se mataupu e fou. O se mataupu e le tupu soo foi, lea ua feagai nei ma le tatou Palemene, sa le i mafaufauina e tupu mai i le tatou Paeaiga lenei, i le tulaga i le tofiga mamalu o le Peresetene o Fanua ma Suafa. O lea ua faaagafua nei i se tulaga e le tumau, le faaiuga a le Komisi o Galuega a le Faamasinoga.

Lau Afioga i le Fofoga Fetalai, o se mataupu e matua taua tele i le Tala Faasolopito o Upufai a lo tatou Malo, o le Malo Tutoatasi o Samoa. A o lea faatoa faatino i le aso, o le uiga tonu lea o le nonofo faafetauagai o itutino malolosi ia e tolu, o faigamalo faatemokarasi, e pei ona i ai isi Malo o le lalolagi, o le Palemene, o le Pulega Faatonu ma le Faamasinoga (*The Parliament, the Executive and the Judiciary*). E nafa ma tonu fai mo le atinae manuia o le

atunuu, o itutino e agaia le isi itutino ma le isi itutino, ina ia faatumauina le filemu o Samoa, ma taofia ai le faaoga sese soonafai, e se itutino o le paoa (*doctrine and checks and balances of power*).

Ae o le galuega ua feagai nei ma a outou afioga, ua malama i ulugalua le pule aoao o le itutino leni o le Palemene, o le Malo Tutoatasi o Samoa (*the Supremacy of Parliament*). O le tafatolu leni o le Faigamalo, o lo o manino lava le taufai tutoatasi, ae aua foi ne i galo, o lo o aiaia ai nisi tiute, i le Tulafono o le Faavae o Samoa. E mafai ai ona aiaina e le Palemene o le Malo o Samoa, nisi o tofiga lea na outou faafogoga nei i ai i le taeao, e aafia ai ma le Peresetene o le Faamasinoga o Fanua ma Suafa, pe afai e tulai mai ai se mataupu ogaoga ua aafia ai le Tulafono. Ae aisea ua faapea ai? O le tali puupuu, o le Palemene leni o Samoa o lo o saofafai ai Taitai Filifilia o Itumalo uma o Samoa. O matai iloga, o matai faiupu e faia tonu ma faaiuga a nuu ma afioaga faapea le Ekalesia pele a le Atua. O lona uiga, o lo o i o outou aao i le taeao leni mamalu faalupelupe o Samoa aoao, o Tupu ma Ee o afioaga uma o le atunuu lea ua afifio i le malae i Tiafau nei. E leai la se isi e toe aisili, a oo loa ina oooo tutu le tai o Fagaloa ae siefuefue le tai o Atoa, o le upu moni e le toe tu se ola. O le Maota leni, o le Maota e lauiluina ai le tofa ma le faautautaga ma fautuaina ai Le Ao o le Malo i se faaiuga e tataua ona fai. O le ala lea a outou Afioga o le faalupega o le Maota leni, o le Fono Aoao Faitulafono a Samoa.

Lau Afioga i le Fofoga Fetalai, o le ala lea o le fautuina o le Lafo a le Taitai o le Malo e fautuina ai le Komiti Suesue Faapitoa a le Palemene latou te sutesueina maeaea leni mataupu i ona itu felefele uma ma toe lipoti mai ai i le Maota leni ma tuuina mai le tuualalo e fautuaina ai le Palemene mo sana faaiuga fai i le toe faaauau o le tofiga po o le faamuta loa.

Peitai lau Afioga i le Fofoga Fetalai, e ao ona motu le pa ua iloa le iā, aua o lo o faafogafoga itumalo ma le atunuu pele, Sui auai o le Komiti na faatinoina le galuega leni, Tofa Nafaitoa Talaimanu Ketu (Taitaifono), Afioga Aliimalemanu Momoemausu Alofa Tuuau (Sui Taitaifono), Afioga Hon Faumuina Tiatia Faaolatane Liuga (Sui usufono), Afioga Faaulusau Rosa Duffy Stowers (sui usufono), Afioga Fuimaono Taala Teo Samuelu Teo (sui usufono), Afioga Toleafoa Ken Vaafusuaga Poutua (sui usufono), Tofa Ili Setefano Taateo Tafili (sui usufono).

Lau Afioga i le Fofoga Fetalai, so o se galuega e faatino e i ai ona luitau e ao ona fofoga i ai le Maota. Lau Afioga i le Fofoga Fetalai ma sui usufono o le Maota, e ui lava i luitau o leni galuega na faaee mai e le Maota, e pei o le taimi sa feagai ai ma le galuega, a o le taimi foi lea o lea e faataoto ma faagasolo le galuega a le Palemene e ala i lana Tala Faatatau Autu o le Tupe 2019/2020. Peitai, e le i vaivai ai le Komiti, sa faatino pea le galuega ina ua maea Fonotaga a le Palemene ma maua ai avanoa e faamaea ai ma silasila totoa i ai aua le taua o leni mataupu ua lafo mai. E mafua ai ona tautino i luma o lau Afioga i le Fofoga Fetalai ma leni Maota faapea Samoa o faafogafoga mai, o leni lava sutesuega sa sagatonu lelei e tusa o taiala na faataatitia i le Saunoaga Faa-Minisita a le Afioga i le Palemia. A o fautuaga ua tuuina atu i leni Lipoti, o le taunuuga o le mafuli o le mamafa o molimau faavae lelei na faataua e le Komisi leni a le Palemene.

E ao foi lau Afioga i le Fofoga Fetalai ona oo sa matou faamatalaga i le tulaga o le nonofo ai o Samoa i le faletele ma le faleoo. Lau Afioga i le Fofoga Fetalai ma

lenei Maota, e manino lava i le saunoaga a le Taitai o le Maota le ogatasi foi ma le taunuuga o le suesuega a le Komisi Suesue, ua manino ua maea ona faatino le galuega a le Faamasinoga, ma ua faasala tupe le Peresetene o le Faamasinoga o Fanua ma Suafa. E leai foi se upu o le faaiuga a le Faamasinoga o Talosaga Toe Iloilo e faamuta ma faaauau le tofiga o le Peresetene, o lea ua taoto mai i le Maota lenei. Ma ou te taofi, ua le ese lenei faatulagaga ma lo tatou nonofo ai i o tatou nuu ma afioaga. E tua mea uma i le faletele e afio ai Sao, e pei o upu a le atunuu e tua le faleoo i le faletele. Aisea? Aua foi o le faletele e teu ai le tofa loloto ma le faautautaga mamao e tausi ai le aiga ma le nuu ma le afioaga, aemaise o le Ekalesia, ona le ese lea ma le pese a le Taofia ma Saleutogi, o lona fale e pola i le tofa ae fola i fetalaiga. Ae mafua i se a ona teu le tofa ma le faautaga? Lau Afioaga i le Fofoga Fetalai ma sui usufono mamalu o le Maota, e teu le tofa ma le faautaga, aua aso ma taeao faapenei. E teu le faautautaga faatoa tatala a le vevesi ina ua nofo filemu le aiga ma nofo lelei le nuu. Ae a tatala le tofa, ona ola lea o le pagota ma maua le fotuai mai o le fuataina, o le toe ola fuataiga. E ogatasi ma le feau o le faaolataga na maluu ai lo tatou Alii Faaola.

Lau Afioaga i le Fofoga Fetalai, ou te fia taua ni mau mai Afioaga Paia a le Atua e fofola ai le fala i lenei taeao. Tusi a Roma, ðAua ua agasala tagata uma lava ma ua le oo ai le mamalu o le Atua, a ua tauamionuina fua i lona Suafa ma Lona Alofa Tunoa i le togiola ia Iesu Keriso, o Le ua tuuina mai e le Atua, o le taulaga mo agasala i Lona toto e maua i le faautatua, ina ia faaalitino mai Lana amiotonu i le le tauia o agasala ua mavae i le faapalepale o le Atua. Roma 3: fuaiupu 23-25. ðA o le tali a Iesu na lua ai le au tusiupu ma le au faresaio na molia atu le fafine mulilua, ðO so outou e leai sana agasala, lua togi sana maa. ðNa mafua ai ona taapeape taitoatasi ina ua faataatia i malae Iesu, le le atoatoa o tagata, tainane tofiga ma faaeaea e oo lava i le Ekalesia na toe foi atu ai le fafine. ðOu te le faasala ia te oe, ae alu ia oe, aua e te toe agasala. ð

Lau Afioaga i le Fofoga Fetalai, o le a ou faasee loa i muliava se i faalanu le vai o tama i le galuega sa fitaituga i ai lenei Komiti mo le manino o le Maota e faapea foi Samoa o faafogafoga mai.

POLOAIGA A LE FONO AOA FAITULAFONO.

- 1.1 O le aso 28 Me 2019, na faamaonia ai e le Fono Aoa Faitulafono le Lafo Faatu a le Afioaga i le Palemia, mo le faavaeina o le Komiti Suesue Faapitoa Faa-Palemene, latou te suesue maeaea lelei le faapogai ma le talafeagai o le Faaiuga a le (JSC) po o le Komisi o Auaunaga Tau Faamasinoga.
- 1.2 E le gata i lea, o Tualumaga o le Faamasinoga o Talosaga Toe Iloilo, atoa ai ma molimau tuufofoga ma faamaumauga tusitusia, mo ana suesuega ma sailiiliga, aua se fautuaga e limataitaiina ai le Palemene, mo se talosaga i Le Ao o le Malo, mo se faaiuga faaiu i le faamutaina le tumau o Fepuleai Letufuga Attila M. Ropati, o le Peresetene o Faamasinoga o Fanua ma Suafa, e faapei ona faia i ai le iuga a le Komisi o Auaunaga Tau Faamasinoga.

Lau Afioga i le Fofoga Fetalai ma sui usufono mamalu o le Palemene, e lua ni Taiala, Terms of Reference na fai ma sini autu o lenei suesuega.

TAIALA O ILOILOGA MA SUESUEGA A LE KOMITI.

2.1 O le sini autu o le galuega a le Komiti Suesue Faapitoa a le Palemene e pei ona faataatia i le lafo faatu, e mataitu ai vaega taua e lua o lo o taua i lalo:-

i Hoiloina lea o le faapogai ma le talafeagai o le faaiuga a le Komisi o Auaunaga Tau Faamasinoga, ina ia faamuta le tumau, le tofiga o le Peresetene o Fanua ma Suafa;

ii Faaaogaina o le Taiala (TOR), ma aiaiga o le Mataupu 68(5) o le Faavae o Samoa, e tuuina atu ai se Fautuaga i le Palemene, e mafai ai ona aveesea, po o le toe faaaauu o le auaunaga a Fepuleai Letufuga Attila M. Ropati, i le tofi Peresetene o le Faamasinoga o Fanua ma Suafa.

2.2 **Mataupu 68(5) o le Faavae o Samoa – “O le a le aveesea se Faamasino o le Faamasinoga Sili mai le tofi, vagana ai ua faia e Le Ao o le Malo i luga o le talosaga a le Fono Aoao Faitulafono, ua faamaonia e nisi e le itiiti i le lua-vaetolu o le aofaiga o sui usufono o le Palemene (e aofia ai tulaga avanoa) o lo o talosagaina mai ai lona aveeseina mai le tofi ona o ni mafuaaga o amioga e le tusa ai ua faatuina mai po o le vaivai o le tino po o le mafaufau”.**

Ou te toe faatepa le Maota i le talaaga o lenei mataupu lau Afioga, na saunoa manino i ai le Taitai o le Maota i lenei taeao, e tauaaoina ai e le Komiti Suesue Faapitoa lenei faaiuga o Faamasinoga faa-Itumalo, o le Faamasinoga Maua-luga e faapea foi le Faamasinoga o Talosaga Toe Iloilo. O lona uiga, na mafua ona silasila totoa le Komiti Faapitoa lenei i talaaga ma faaiuga o Faamasinoga nei e tolu e pei ona faafofoga i ai i lenei taeao, na fai ma taiala o le galuega na fitaituga i ai le paia maua-luga o le Komiti.

O lona lua, sa tauaaoina foi e le Komiti le Tusi Talosaga a le Peresetene o Faamasinoga e faailoa ai i le Afioga i le Peresetene o Faamasinoga, o le a le faamavae ae o le a talia se lafo i le Fono Aoao Faitulafono, o fea e taoto i ai lo latou finagalo ma se faaiuga, o lena o le a fai. Na tauaao foi e le Komiti fautuaga a le Komisi o Auaunaga o le Faamasinoga, na tuuina atu i Lana Afioga Mamalu O Le Ao o le Malo, a o le aso 10 Me 2019 na sainia ai e Lana Afioga Mamalu O Le Ao o le Malo le Poloaiga, o le Warrant of Suspension, e afua ai ona oo mai i le aso, faamalolo le tumau le Afioga i le Peresetene o Faamasinoga o Fanua ma Suafa. Tauaaoina foi e le Komiti le Pepa a le Palemene Faapitoa, mo le faatuina o le lafo e talanoaina ai le mataupu lenei. O lea sa outou faafofoga i ai i le aso 28 Me 2019, ou te manatu ua tauaaoina e sui usufono mamalu uma o le Maota le saunoaga manino ma le atoatoa o le lafo a le Afioga i le Palemia.

O molimau tuufofoga sa filifilia lava i le tulaga o le tomai, ia mafai ai ona fesoasoani e le gata i Tausalumaga o Faamasinoga ao le faaiuga. E toasefulu i

latou sa mafai na tuuina mai molimau tuufofoga i totonu o lenei Komiti, na mafua ai ona oo le Komiti i lana fautuaga, lea ua folasia i le Maota. Silasila foi lenei Komiti i le Tulafono o Fanua ma Suafa 1981 i le fuaiupu 26(d), ma le mataupu 68(5). Article 68(5). E faapea foi le mataupu 68(6) o le Faavae o Samoa. O lea e taoto uma ai faaiuga, sa iloilo totoa e le Komiti.

Lau Afioga i le Fofoga Fetalai, e i ai nisi sui usufono o le Palemene na faatalosagaina so latou avanoa mo le Komiti, e fofoga ai so latou finagalo i le mataupu, ae o le talitonuga o le Komiti, o lo o i ai pea lo latou avanoa faaauo e saunoa saoloto ai i totonu o le Palemene. E pei lava ona tatala ai le taofi i lenei taeao, ao faafogafoga le atunuu i taimi e tagofia ai le Lipoti e le Fono Aoaofaitulafono. E manatu le Komiti ina ia lava se taimi e sailiili maeaea ai i faamaumauga, ma molimau tuufofoga i le auga tonu o le faataatiaga o le lafo, e uiga i le faaiuga a le Komisi o Auaunaga a le Faamasinoga. O le faaiuga o Faamasinoga o Talosaga toe iloilo, faapea ma isi faamaumauga ua latou tauaaoina, e agai tonu i ai le mataupu o lo o suesueina. O molimau ua filifilia, e leai so latou avanoa e faaalua ai so latou finagalo i totonu o le Maota lenei. Na faavae ai le manatu o le Komiti, e agai tonu le faatinoga o lana suesuega ma toe lipoti mai e pei ona faatonuina e le Fono Aoaofaitulafono. E talitonu le Komiti ua lava ma totoe nei faamaumauga e taiialaina ai lana iloiloga, ma vaega e ao ona faatauaia. E le o se Faamasino le galuega o le a toe feagai nei ma le Komiti, e leai. O le sini autu o le iloiloga ma suesuega a le Komiti, o le agai tonu i le agaga o le lafo faatasi ai ma faamaumauga ua tauaaoina, o lea ua folasia i lumamea e ala i lana fautuaga.

Lau Afioga i le Fofoga Fetalai, a umi sa matou talanoa e sala ina umi, aua e le faigofie le mataupu lenei, e pei ona outou faafogafoga i ai i le saunoaga a le Palemia. E manino lava auofala, o sailiiliga ma suesuega a le Komiti sa tagai manino i le faaiuga o le Faamasinoga o Talosaga toe iloilo. Na o latou faamaonia ai le solitulafono o le faaoo manua i le Vaega 119(1) o le Tulafono o Soligatulafono 2013. Ua latou tuuina atu ai le faasalaga e \$5,000 ma le \$2,000 e totogiina atu i le na aafia. Sa matua manino ai le silasila a le Komiti i le faatauaia e le faaiuga, alii ma tamaitai o le Faamasinoga o Talosaga toe iloilo, le taua o le sao o le Peresetene, i lana tautua ma lana auaunaga i le Faamasinoga, e ala i le Faamasino o Fanua ma Suafa. O lo o faailoa ai e 18 masina na tauaveina ai e le Peresetene o le Faamasinoga o Fanua ma Suafa ua faamalolo le tumau nei, ao ana galuega e 360 faaiuga o Faamasinoga Apili o Fanua ma Suafa ua maea ona faatino.

Ua le gata foi i lea, o lo o atagia ai o le solitulafono ua faamaonia, e le o se amioga na faia i va o se loia ma sana client, **lawyer and client relationship**. Po o se faaaogaina le tataua o tupe **misappropriate use of funds**, po o se amio le tonu, **offence of dishonesty**. O lo o maioio mai ai le le fesootai o le solitulafono ua faamaonia ma le faatinoga o tiute faa-Peresetene o le Faamasinoga o Fanua ma Suafa, e le fesootai.

Sa faamaonia foi e le molimau a le Pulega o Sosaiete a Loia na matou feiloai, e le o se amioga na faia i le va o le loia ma sana client e leai, po o se faaoga le tataua o tupe po o se amio le tonu, e leai. O le manatu o le Sosaiete, e mafai lava e Fepuleai tulou le suafa, toe tusi talosaga atu i le Sosaiete mo le tusi faamaonia, e galue ai faaloia e tusa ai ma aiaiga o Tulafono a loia a Samoa 2014. E faapea foi

ona o latou faamaninoina i le Komiti lenei, le faaauau pea o le galuega faaloia. A na faapea e maua se faamatalaga ma faamaonia, lau Afioga i le Fofoga Fetalai ma le paia o le Maota, o le tasi lea agavaa taua o lo o maua i le faafaigaluegaina o Faamasino, aemaise o le Peresetene o Faamasinoga o Fanua ma Suafa.

E lelei foi lou oo i le mea lea, ao faafogafoga Samoa ina ia aua ai nei **mislead**, e pei ona i ai i le nusipepa, taimi e le i mamao atu, o lo o faailoa ai le upu **unconstitutional**, o le galuega o lo o feagai nei ma le Maota. O lona uiga e foliga mai e le faavaea le galuega o i luma nei o a outou Afioga, o le ala lea o le fia oo i ai o sa matou faamatalaga. Ae i le suesuega, o lo o matua manino lava le Vaega 26(a), o lo o puipuia ai le tulaga e pei ona feagai nei ma le Maota. O lona uiga, o le avea ma Peresetene o le Faamasinoga o Fanua ma Suafa, o ia lava o le Faamasino o le Faamasinoga sili. O le mea lea, lau Afioga i le Fofoga Fetalai, ua ou oo mai i le itu lea, e lelei ona faamanino ao taumafai se lipoti o le galuega sa faatino.

Sa tauaaoina foi e le Komiti se tasi o tusi aloaia mai le alii polofesa, o le sa feagai e le gata i le tulaga o le aoaoina faa-Palemene o sui mamalu o le Maota, ae faapena foi i alii faamasino o le faamasinoga (ISP) na ia taua ai, **"I quote Samoa would lose more than a public officer, if he is might be continued to serve his country will lose a great Samoan"**. E atagia ai i ia vaega uma le faatauaina o le auaunaga le Afioga i le Peresetene o lo o faamalolo le tumau nei. E le gata i le faamasinoga faa-Itumalo e faapea foi ona tauave mai e le Faamasinoga o Talosaga toe iloiloi, Mediation Factors. O le agaga lea sa silasila totoa i ai le Komiti, ae peitai lau Afioga i le Fofoga Fetalai ma sui mamalu uma o le Maota.

Sa tauaaoina foi e le Komiti se fautuaga mai le Loia Sili a le Malo ma le ona ofisa. O lo o agai lava o latou finagalo i le faatauaina o le Rule of Law. E pei ona faamauina i le fuaiupu 15, o le Faavae o Samoa. E ao ai ona tutusa tagata uma i le silasila a le Tulafono, ona e le faailoga tagata le faatinoina o le Tulafono. All persons are equal before the law then entitle to equal protection under the law. O lea lava mau sa lagolagoina foi e le sui Faamasino Sili ma ua tuufofoga lana molimau. A lilifa lava foi le finagalo o le Afioga i le Faamasino i le tulaga o le integrity o le Faamasinoga. O le tu mamalu ma le tino e tasi, ae peitai na ia ioeina foi, ua feagai nei le Faamasinoga o Fanua ma Suafa ma nisi o faafitauli, e le pei ona i ai i le taimi muamua. O mataupu tuua a le atunuu, tulaga o faaiuga o apili, ma ua manaomia ai le vave fai i ai o se faaiuga a le Palemene i le mataupu lenei.

Ma le vaega mulimuli, sa feiloai le Komiti e le gata i le Afioga i le Peresetene ua malolo le tumau, ae faapea foi le na aafia i lenei mataupu. O le ala lea a outou afioga sa faamuamua ai sa matou faamatalaga ina ua fofola le fala. I le tulaga o le nonofo ai o tatou afioaga ma nuu, sa atagia i le aso lea. E le gata o upu na faailoa mai a o amioga. Na tutulu ma ua lagona le salamo, o lagona o le faamagalaga i le mea na tulai mai. A ua manatu e agai i luma mo le lelei o Samoa aemaise o le tautua faa-faamasinoga.

Lau Afioga i le Fofoga Fetalai, ma le mamalu o le Maota o le isi lea vaega tele sa taua i le matou suesuega. O le upu fefaamagaloa'i, na taua ai e le ua aafia, manao e toe foi atu. O le mea ua tupu ua le toe manatua, o le mea lea lau Afioga i le Fofoga Fetalai faapea foi le faafogafoga a Samoa, o le ala lea o le oo o sa matou faamatalaga i le nonofo ai o sao o aiga ma ona aiga. E faapea foi le tausiga o afioaga taitasi. I le tulaga o le pulega mamalu a alii ma faipule ma le faatinoina o

faasalaga i totonu o afioaga taitasi. E afua i se a? aua o le Maota lenei o le Maota o matai, ua maea le galuega a le Faamasinoga. O lea ua lafo mai i le Maota o le atunuu, o matai filifilia o le atunuu i Itumalo uma o Samoa. E filitagaga le tofa ma le faautautaga, i le tulaga o le tausiga o le mamalu ma le filemu o le atunuu.

Ona taunuu ai lea o le suesuega a le Komiti i lona aotelega, lau Afioga i le Fofoga Fetalai, le mamalu o le Maota, a silasila totoa i le tulaga na laga i le mataupu 15 o le Faavae ma le 68(5), na maua ai le le feaiaai o mea ia e lua. Na taua foi i molimau o e nonofo i le Nofoa o le Faamasinoga, o le Faavae o Samoa le le feaiaai o mataupu.

O le mataupu 15, o lo o talanoa i le tulaga e faatatau i tupuaga, tane po o se fafine, e aiatutusa ai gagana, le lotu, o nuu na fanau ai o tulaga faaleaiga po o nisi lava o ia mea, lea sa matau ai e le Komiti. E agai lava le vaega 15 lea, e aiatutusa i vaega e pei ona ou tolaulau atu.

A o le vaega 68 (5), o amioga e le tusa ai ua faatulai mai (stated misbehaviour) sa tagai totoa i ai le Komiti i le vaega lea peitai, e le i mafai ona faafogaina pe tauaaoina ni mau ma ni molimau e faailoa ai le uiga moni e tatau ona faatino ai le uiga o amioga e le tusa ai ua faatuina mai.

E faapea foi ona maua e le Komiti lau Afioga ma le mamalu o le Maota, le le taoto lelei o ni taiala e fesoasoani i le suesuega, i tulaga o le faatinoga o auunaga faale-Faamasinoga, aemaise lava i Alii Faamasino. Na toe agai le silasila a le Komiti Faapitoa i tulaga sa faia ai le faaiuga i lalo o le Faamasinoga Faaitumalo, lea na fai ai le iuga (**discharge without conviction**). Na faasaolotoina ai e aunoa ma le faamaonia faaletulafono o moliaga. Sa silasila le Komiti o le Faamasino o le matai Samoa.

Na silasila i le tulaga o le tautua, o itu lelei o le auunaga, e ui lava ina matuia e pei ona outou faafogoga i ai i le aso, peitai o le iuga na fai, na faia e le Faamasinoga faa-Itumalo, lea ua outou faafogoga i ai. E atagia ai le taua i le Faamasino o le auunaga mo tagata o le atunuu, aemaise le toatuga o lo o tulai nei i totonu o le Faamasinoga o Fanua ma Suafa. O lea foi na atagia i le faaiuga i le **Court of Appeal** o lo o faatauaina ai le auunaga, ofoina atu o le ola. Ioe o le mea na tupu, e le taugamalie, peitai o lo o atagia ai e ui lava ina faamaonia, ae o le faasalaga e faasala tupe. Lea ua afua ai ona oo mai le mataupu i le Maota lenei, ana fai lava e latou le faaiuga ua uma, e tatau ai. O le mea lea lau Afioga i le Fofoga Fetalai, na silasila le Komiti i tulaga na faavae ai le latou fautuaga mo se tofa, se uta o se moe a le Maota, e pei ona loloma nei i lenei taeao.

Lau Afioga i le Fofoga Fetalai, ina ne i ou momoo lava i ia o le loloto ae galo ai figota o le aloalo, ou te fia faaogaina ai lenei avanoa ae ou te le i oo i le aotelega o le fautuaga, ou te liliu ai se i momoli le faamalo ma le faafetai a le Komiti i lau Afioga i le Loia Sili ma le Ofisa, e le i faigofie lo outou faiva. O le upu moni lea i la matou vaai ma le iloilo ma le suesue taofi iu maea lava ua a? Ia maua le toafilemu o Samoa, a o lau Afioga foi o le lima taumatau o le Malo, tulaga o le fautuaina i Tulafono. E le alu loa i sa matou faamatalaga ae ao ona afe, se i momoli atu le faafetai tele i lau Afioga, ma le mamalu o le Ofisa i le faaauuina mai o faamasinoga ia e tolu. Malo le galue! Malo toa! Malo onosai! faaauu ai pea, faaauu ai le galuega.

E momoli foi le faafetai a lenei Komiti, i le paia maualuga o Alii o le Faamasinoga Sili, Tamaitai, Malo mo le galuega, matauina e le Komiti, le le

faigofie o lo outou tiute, ma o le mea ua atagia ai i suesuega, o lea foi e agai lo outou finagalo, ia vave faaleleia faafitauli o lo o tulai mai i le Faamasinoga o Fanua ma Suafa. O lea foi ua toe amata ma toe pile up le backlog, faila tuua ma mataupu tuua a le atunuu, ona o le mataupu e pei ona fofogaina i lenei taeao.

Ona oo mai lea lau Afioga i le Fofoga Fetalai i le sui o le galuega e faavae i luga o ana sailiiliga ma ana suesuega ua fautuaina ai e le Komiti Suesue Faapitoa lenei, le Fono Aoaofaitulafono e faapea:

1. Ia faamauina loa e le Komiti Faapitoa le faaiuga a le Komisi o Auaunaga a le Faamasinoga, sa faatinoina lava i ala o le Tulafono e tusa ai ma le mataupu 68 (6) ma le Tulafono o le Faamasinoga o Fanua ma Suafa 26 (b).
2. E faavae i luga o sailiiliga ma suesuega o molimau tusitusia ma molimau tuufofoga faamaumauga ma faaiuga a le Faamasinoga ua taunuu ai le Komiti Suesue Faapitoa i lana fautuaga, e fautuaina ai le Fono Aoaofaitulafono, i le aveesea o Fepuleai Letufuga Attila M Ropati, mai le tofiga o le Peresetene o le Faamasinoga o Fanua ma Suafa. Lau Afioga i le Fofoga Fetalai, o le aotelega lea, o lenei galuega e ui lava ina puupuu, ae sa tuu ato i loto ma mafaufau ma le malosia e tusa ma le valaauina ma tofiga o le Maota lenei.

Manuia lau Afioga i le Fofoga Fetalai, lau Afioga i le Palemia ma le Kapeneta ma lena itu o le malu, manuia lea itu o le malu ma le tapuaiga a Samoa, manuia le Fonousu a Samoa.

FOFOGA FETALAI: Malo, faafetai mo le tapenapenaga maeaea a lau Afioga i le Taitaifono o le Komiti Faapitoa sa feagai ma lenei mataupu. Ma o le avanoa foi lenei, e i ai ni sui usufono e fia saunoa i le tatou mataupu e pei ona ia i, ona tuuina atu ai lea...

Afioga SULAMANAIA FETAIAI TAUILILI TUIVASA (Vaimauga Sasae): Lau Afioga i le Fofoga Fetalai pe a tusa ai ma le malologa, o lea e lava le taimi pe maua se avanoa o lenei itumalo.

FOFOGA FETALAI: Ia, malo le faamanatu mai, o lea ua tatou feagai tonu ma le malologa, ia o le tatou galuega lava e faapena.

Ia o le a faataatiaese galuega a le Fono Aoaofaitulafono mo lana malologa masani.

Na faataatiaese Taualumaga a le Fono Aoaofaitulafono mo lana malologa masani i le itula e 10:44-i le taeao ma toe faaauau i le itula e 11:33 i le taeao.

FOFOGA FETALAI: Ou te faasilasila atu ua toe amatalia Taualumaga ma Galuega a le Fono Aoaofaitulafono.

E i ai le manatu ua faaopoopoina le malosia o le paia o le Palemene e faaauau ai le tatou Galuega. E faia le malologa ua tulai mai le sui usufono mo Vaimauga i Sasae.

Ia se i tulai mai le Afioga i le Sui Palemia.

Afioga Hon Fiaame Naomi Mataafa: Lau Afioga i le Fofoga Fetalai o le mea e fia malamalama. Faafetai lava o lea ua maea le saunoaga a le Taitaifono o le Komiti sa soalaupuleina lenei mataupu ma o lea ua ootooina mai ai le Lipoti.

Faamolemole lau Afioga i le Fofoga Fetalai, ou te fia malamalama i ala o mea ae le i amataina le tatou faatalatalanoaina o le mataupu, ona o lea ua faataatia le lafo a le Komiti ina ia taliaina le latou Lipoti, a o lea foi ua taatia le lafo a le Malo e auga i ai le faatalatalanoaga.

E fia malamalama lau Afioga i le Fofoga Fetalai i le maea ai o felafolafoaiga a le Maota, po o le a le auala e fai ai mea ia e lua, aua o lea ua taatia le lafo e talia le Lipoti. O le fesili la; a talia le Lipoti ua malolo ai le lafo a le Malo. E pei o le mea lena e le o manino i ai lou sui usufono e faafesili atu ai ma le faaloalo po o le a le faasologa o le tatou mataupu.

FOFOGA FETALAI: Malo faafetai. E agatonu foi manua o le fesili ona ua faafesili mai lau Afioga i le Palemia i le faagasologa o le tatou galuega. I le faafesili mai a lau Afioga i le Tamaitai Sui Palemia, pei foi ona maua, ua maea le saunoaga a le Afioga i le Palemia ma ua faatu mai le lafo ma ua faaluaina, ona taoto loa lea e le i tuuina atu le fesili e tusa ai ma le faamaoniaga o le lafo e pei ona faatuina mai e le Afioga i le Palemia ma faaluaina e lau Afioga i le Sui Palemia. Ua faapena foi ona tuuina atu le avanoa i le Taitaifono o le Komiti ina ia folasia le Lipoti a le Komiti ma tuuina mai i luma o le Palemene le fautuaga, ma ua faapena ona faaluaina, ma ua taoto ai foi ae le i tuuina atu le fesili.

O lea la ua i ai le manatu o le Nofoa, o le a lafo i le Palemene i le latou faatofalaiga, o ai e fia saunoa e tusa ai o lenei mataupu, ona maea lea ona tuuina atu lea o le fesili, e faamuamua le fesili mo le na faamuamua le lafo e pei ona faatuina mai e le Afioga i le Palemia ona tuuina atu loa lea o le fesili lona lua, o le fesili ina ia faamaonia le Lipoti a le Komiti e tusa ai o le tulai mai foi o le latou galuega. Ae pei e faapena se lagona, ae manatu, e faigofie lava le tatou mataupu aua...

Ia se i tulai mai le Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, e pei o lou faauigaina o le lafo a le Taitaifono o le Komiti, o le talia mo le talanoaina. A o lau faauigaina lena, o le talia mo le talanoaina, o lea la ua tatou talanoa, a o le lafo autu lea na ou faatuina atu.

FOFOGA FETALAI: Ia ua ou manatu e le afaina foi lea itu e pei ona tulai mai lau Afioga i le Palemia, e mafai foi ona tuuina atu le fesili ina ia talia le tuuina mai o le Lipoti a le Komiti o lea ua talanoaina faatoa tatou see atu lea i le faatulagaga o fesili. Masalo o le tulaga e leai sona eseesega tele. Ae ua ou manatu, ua sili foi lea pei ona tulai mai lau Afioga i le Palemia, ina ia tuuina atu le fesili e talia ai le faataatia mai i luma o le Palemene o le Lipoti a le Komiti mo le talanoaina, ua ou iloa e sili lea. Ona o lea ua faaluaina le lafo e pei ona tuuina mai

e le Taitaifono o le Komiti ina ia faataatia i luma o le Palemene le tuuina mai o le Lipoti a le Komiti.

O le fesili pe o le a faamaonia le tuuina mai o le Lipoti a le Komiti i totonu o le Palemene, o e finagalo i ai saunoa mai i le ioe...

Afioga Hon Fiamē Naomi Mataafa: Lau Afioga i le Fofoga Fetalai, ou te auai i le finagalo o le Palemia. A o le faaupuga la o le lafo, o le talia o le Lipoti mo le talanoaina, ae le o le talia o le tino o le Lipoti aua e eseese mea na e lua. Faamolemole lau Afioga, ia manino le faaupuga o le tatou faagasologa o le galuega. Ma ou te fia teuteuina le lafo e pei ona e saunoa mai, e talia le Lipoti mo le talanoaina.

FOFOGA FETALAI: O le faatuina mai o le lafo e pei ona saunoa i ai le Taitaifono o le Komiti e faapea; lau Afioga i le Fofoga Fetalai ou te faatu atu le lafo, ina ia faautagia e le Fono Aoa o le Lipoti a le Komiti o lo o tuuina atu ai ana Sailiiliga ma Fautuaga.

Ia, o le tulaga lena. Ua i ai le manatu o le tulaga tonu lena e pei ona saunoa i ai le Afioga i le Palemia, o le ala foi lena sa manatu ai ne i i ai se fenuniaiga ona taoto lea ae tatou see atu i le talanoaina. Ae ui i lea, o lea ua fesoasoani mai i le faatulagaga o tatou galuega ina ia faautagia e le Fono Aoa. E i ai le manatu ina ia talanoaina e le Fono Aoa le Lipoti a le Komiti po o le teuteuga lea ina ia sagatonu ai le tulaga o le tatou galuega?

Ia, o le a sui la le lafo e faapea, ina ia talanoaina e le Fono Aoa le Lipoti a le Komiti, ma ua faapena ona faaluaina.

E le i faaluaina le lafo.

Na faamaonia le lafo.

FOFOGA FETALAI: O le a talanoaina le Lipoti a le Komiti. Ma o le avanoa lenei e tuuina atu i sui usufono mamalu o le Palemene e tutulai mai ai e saunoa e tusa ai o lenei mataupu.

Ou te tapa ma le faaaloalo lau Afioga i le sui usufono mo Vaimauga Sasae.

Afioga SULAMANAIA FETAIAI TAUILILI TUIVASA (Vaimauga Sasae): Faafetai. Masalo o lea ua maea le faasiliga malosia ma le taliga foi o le sua i lenei Maota aua le faatautaiga o le Fonousu a le atunuu. A o le i faia la se sao o lenei itumalo i le Lipoti a le Komiti Suesue Faapitoa a le Palemene sa faatautaia lenei mataupu, e muamua ona ofo alofa atu ma faatalofa atu lenei itumalo i lena Itu o le Maota i le afio o lau Afioga i le Palemia ma le Sui Palemia aemaise o le Kapeneta faapea Minisita Lagolago.

Liliu mai foi i lenei talaga atoa, e faatalofa atu i le paia i Afioga i sui usufono o le Palemene o Samoa, ae a lau Afioga i le Fofoga Fetalai ma le Sui Fofoga Fetalai, faamalo le galulue, faamalo le faatautaiga o si o tatou sa, o lea ua matau atu po ua tolu lenei o vaiaso o feagai pea lenei Fonousu ma le soalaupuleina aua se manuia o le atunuu.

E faafeiloai foi i le Ofisa Sili o Pulega o Matagaluega ma Faalapopotoga a le Malo, o outou o lo o lima ma vae i ai lenei Palemene i le faatautaiga o si o tatou atunuu.

A o le i faia foi so matou manatu, e ofo alofa atu i lau Fetalaiga Lima i lou tulai mai i le tofi Failautusi o le Fono Aoao lenei aemaise le Ofisa o le Fono Aoao Faitulafono o lo o galulue ma tua i ai le Maota lenei i taimi o ana Fonotaga.

E faatalofa atu i le tapuaiga a Lana Afioga Mamalu O Le Ao o le Malo, aemaise le Masiofo faapea foi le Afioga i le Sui o le Fono a Sui Tofia ma le Masiofo, ae a le Sui Faamasino Sili, faapena foi Afioga i alii ma tamaitai Faamasino ma le Ofisa o Faamasinoga. E le mafai lava ona galo le tapuaiga a le aufaigaluega paia a le Atua i so o se fatafaitaulaga, o outou o lo o nonomanu e ala i tatalo ma anapogi, tulivae i le Atua aua se manuia o Samoa ma ona tagata. E le mafai foi ona faagaloina le tapuaiga a si ou itumalo pele o Vaimauga Sasae mai lava i Fusi ma Fanuatanu, o Lalotea, Niniva ma Punialavaa, Fatitolo ma Pilioua, po o le paia a lea aua le afifio o Aiga e Lua aemaise le nofo a tula, ae a Samoa aoao o lo o faafofoga mai i maota ma laoa aemaise o atunuu mamao, ia tapuai maia se i fai se tatou sao ia manuvao e tusa ai ma le ogaoga ma le maualuga o lenei tulaga ua oo i ai le Palemene lenei o Samoa.

Fai mai o Samoa e le o se atunuu taliola, o le atunuu ua uma ona totofi. E mafua mai fea? Ua iloa a tupuaga i tupu, ua iloa tamalii, ua iloa faleupolu, ua iloa foi le au tautua, e leai a se vave na te toe suia le tulaga lea i le tatou atunuu. Ina ua taunuu le talalelei, o lea na faavae ai lo tatou atunuu lenei, fai mai e faavae Samoa i le Atua, le Atua le Tama, le Atua le Alo, le Atua le Agaga Paia lea tatou te solisoli mulivae ai lava. O le faafetai lea i le Atua. Ina ua omai le au Misionare, e omai lava o la e foi e tapuai tatou i lo tatou Atua, ae omai ma le talalelei lea ua faakerisianoina ai Samoa aoao. O lou agaga faafetai lea. Ae ta te tu lava i lenei taeao ae ta te liua, ona e a? E ese le matautia o le mea lea ua oo i ai lenei Paeaiga ua ta i ai, ua fai ai le finagalo o tupu ma tamalii o le atunuu i totonu o le Maota lenei i tofiga o lo o i totonu o le Faavae, e ala i le Faamasino Sili aemaise o le Peresetene lea ua i ai le taeao lenei. E momoli lou agaga faafetai i le Atua, faafetai i le sao o le taimi ua aumai ai au i totonu o le Palemene lenei. O lea foi ua maua mai e vaai atu o lo o i ai ni toe Ulutaia matutua e ala i lena talaga atoa i le Afioga i le Palemia, le Sui Palemia, faapena foi i lenei itu o lea e afio atu Aeau, ae a lau Afioga i le Fofoga Fetalaiga lea e see ai le sa o Samoa.

Ae faavae sou manatu i le tulaga lenei ua oo mai i le Maota, e faavae mai totonu o pulega a alii ma faipule, o i o le ki ma le tatala o le atunuu lenei o Samoa. E iloa gofie lava nuu ma itumalo o lo o mamalu ma lelei pulega a alii ma faipule, e leai lava se mea o gase, o la e malu. E lagolago i mea fai a le Malo ma le atunuu lenei. Ae iloa gofie lava nuu ma itumalo ma afioaga o lo o malepe faiganuu ma itumalo, o lea ua tatou vaai i luga, tele faamasinoga tele mea e tutupu, ona o le a? E le o kea le tupulaga i nai matai. O le a le upu matai? Matai, e mata i ai mea uma lava, mea lelei, mea leaga, o le ala lea. O le ala foi lea ou te faafetai ai i le Atua na totofi ai lenei Palemene e tau o le Fono Aoao a Samoa. Fono Aoao, e leai se isi i luga atu, o le Fono Aoao Faitulafono e faia Tulafono, e faatonutonu le lelei mo ona tagata, saili mea tonu. E i ai le taeao lenei. Ou te faafetai foi i lenei taeao, o le mea lena na aumai ai tatou i le tulaga faamatai. Faafetai lava ua leai ni taulelea se i tulou, lea sa i ai i totonu sa nofoi ai, ae a? E totofi mai a i totonu o pulega a alii

ma faipule matai e omai e fai tonu o le atunuu lenei. O Samoa aoao lea e i totonu o le Maota lenei. Ou te le talanoa i le Komiti ma le Lipoti a le Komiti ua aumai i totonu o le Palemene lenei. E talanoa a lou sui usufono i le mea na aumai ai au e lou itumalo. O le mea tonu lava lea, o le tofa paia, faautautaga oo i tatou matai lea na omai e fai le tulaga lea. Ou te fesili i lou itumalo i ou auala po o a mea e fai, a o le mea lea, ua aumai e le Atua le musumusuga, leaga o le taeao ese lenei i totonu o le Maota lenei, o lea e faavae sou manatu i totonu o pulega a alii ma faipule, a agasala se isi ona aumai lea i totonu i i, fai i ai tala a faleupolu, fai i ai ma aoai ma faatonu, ia ta le fa i le aso lenei ua alu ese ma le nuu, alu ese ma le nuu, tauvlea le nuu, tauvlea le itumalo. Ia ona lafoai lava lea, ma fetuunai le faautautaga i faleupolu, ona malele lea o le matuatala, po o le o lo o faasaosao mai. Fai mai si ana tala, o le tatou nuu po o le tatou itumalo lenei e sa ni tagata faatetea ona o mai i ai, e faasa. Ae o lea la o le a faatea atu le tama lea. O fea e alu i ai? O le a le fesili a tagata na fai mai? O ai na i ai i lona nuu ma lona itumalo? Se leitioa lava o le tamalii lona e soo i lona tama le faimea leaga. E le tautua, na ou tulai mai i le faiga o le nuu, talofa e. O le fesili ia a tagata lea o le a omai i ai, ona faatea lea.

Ae a lelei foi se faaiuga e fai i totonu o pulega a alii ma faipule, ona alu foi lea o le tala ave i le atunuu ma le... o ai na i ai? O ai na i totonu o lona nuu? Oi talofa e, e leitioa lava e ese le lelei o le tamalii, soo lava i si ona tama, e le lelei ni ana aoga, ae na tautua lava i le nuu. O tala ia. O lenei taeao lau Afioga i le Fofoga Fetalai, o ai e tua i ai Maauga? O le Maota lenei, le tofa paia lenei. Fai mai a sulu i ai le pagota e ola. Se i tulou lava le paia o le Faamasinoga ou te le oo, e le aia moo i liu o vaa. Uma ona faatino la tou pitolaau, Ofisa o Loia faafetai.

O le tamalii lea Loia Sili ma lana Matagaluega, puipuiga o le atunuu lenei. E le afea lava e le sui usufono o lenei itumalo lo outou paia. O lea ua aumai e fai le tou tofa, o le a le mea na aumai ai oe? Lau Afioga i le Fofoga Fetalai e tu ai i fea Maauga? E tu lava i Nuuasala. E alualu lava timaiga ma saunoaga i totonu ae fai mai le isi tala a le isi toeaina, e ui lava i lea, ui i lea, ua aoga le tama, ua aoga e sau e fai se sao. Ia tatou vaai foi i lenei tulaga ua i ai, ua malepe lona tamaliiaga, aiga, nuu, ekalesia ma atua ua malepe. Ae ou te talanoa atu i lenei taeao, e taua i tagata, e le oge tagata, e le oge loia lo tatou atunuu, ae taua le tagata o le mea lona na fai e le Atua.

O lenei foi tulaga ua tatou oo i ai i lenei taeao, e o plan a le Atua, na aumai e le Atua e tofotofo ai le Palemene lenei. Sa fai e o tatou tuua, fesoasoani ai ma nai Malo Aafaatasi, na faa-tutoatasiina lo tatou atunuu, aua o lea e alalaga o tatou o tatou e leai sole, ana leai foi le fesoasoani mai o le Malo Aafaatasi e le mafai e tatou. Ua a nei? O lea ua tatou tutoatasi, tutoatasi ae o lea lava tatou te mananao e pei o Tutuila lea se i tulou Toelau, fai mai amuia latou, ua o mai Aikupito i manuia. Ae o lea ua toe tepa i tua.

Lau Afioga i le Fofoga Fetalai, e i ai se manatu o fea e tua i ai Maauga? O le Maota lenei e ola ai le pagota, e oti ai foi ia le a? Le tofa paia, le faautautaga lea na aumai ai oe, se i tulou lava le Komiti leai, talanoa lava le sui usufono lenei o Sulamanaia, o le manatu na aumai e le Atua i lou loto, e leai se tagata e le aoga i luma o le silafaga a le Atua. Ou te le talanoa ona ou te le aiga i lea tamalii, ae ou te talanoa i le mea na aumai ai tatou. Lea ua tau atu ai ia Samoa ma le lalolagi atoa le malosiaga lea e i le Palemene lenei, na pau lava lona. Ua a nei? Lea ua

fesiligia e nisi le malosiaga, o ai e faia le Tulafono? O tatou talofa e, talofa e i lau Afioga i le Fofoga Fetalai, o lea ua fesiligia, a o iinei e 40, 50 sui usufono na aumai i tatou e itumalo i le a? Palotaina e lo tatou atunuu faatasi ma le musumusuga a le Agaga Paia, alu le tama lea, alu le tina lea.

FOFOGA FETALAI: Malo, toe lua minute o le sui usufono.

Afioga SULAMANAIA FETAIAI TAUILILI TUIVASA: Ia o le a faaiu atu, e ui lava e tele se mea sa fia talanoa ai, ae o le sui usufono lenei, e lagolagoina le faaoga o lea foi tamalii o le atunuu. Aumai e fai sona sao, ua lava ma totoa saunoaga ma mea sa tulai ai, ae aumai e fai se sao aoga ona o lou popolega o lea e i totonu o le Faavae na fai e o tatou tuua.

A faapea o le a tatou faia se isi fuafuaga, ia se i silasila i le Faavae pe e le tatau ona sui. Ao lou popolega na i le mea na vaai i ai, nai o tatou tuua ua lagomau mai i tiasa, aemaise foi o nai papalagi na i ai i na taimi, faamaualuga lava ma faamatietie lenei tofiga, ia aua ne i vave aiaina ma ia i ai foi tagata e totofi i ai lenei fuafuaga, le faatauaina o lona tofi, i le faatauaina... ou te le auai i le mea lea o le tele o faamasinoga se i tulou le Faamasinoga. Talanoa atu fai mai e au, e alu ese leaga e relate se o Samoa o le aiga. Fai lau faaiuga i le mea na sau ai oe, totonu foi o pulega a alii ma faipule ua malepe. 100, 200 matai ulu, matai sao, matai taua, fai i ai se tatou galuega a le Palemene, leai ua malepe, o le a nofoai tatou. O i, mamalu ai totonu o le... na o le maua lava o le suafa o le isi alu i Niu Sila. Fai atu mea iinei, taofi mai, pulega ia o lea e naunau i ai le sui usufono lenei. A mamalu lava i totonu o le lotoifale, mamalu foi Samoa.

Manuia le Fonousu a le atunuu, e lagolagoina e lenei itumalo le toe faaoga o lenei tamalii e tusa ai ma le lipoti o opea nei i le Maota.

FOFOGA FETALAI: Malo saunoa, ia tulai mai le sui usufono... tuu atu lava i le sui usufono mo Salega, malie o Gagaifomauga Nu.3.

Susuga Hon LAULI POLATAIVAO LEUATEA (Gagaifomauga Nu.3): Momoli atu le agaga faafetai i le Afioga i le Taitaifono, lau Afioga foi i le Fofoga Fetalai o le Maota Fono o Samoa.

Tulai ma le ava ma le faaaloalo tele, i lenei foi taeao faitaulia o le Palemene o Samoa. O le aso ma le filiga, o le aso foi ma le mataigatila, o le aso foi ma le mea e tupu ai, ma le aso foi ma le mea na fai ai. Na ou manatu lea, o lea ua sooula le fala, ma ua atoa pou o saunoaga o le Maota Fono i Tiafau. O le Fono silisili a Samoa, o le fonu na filitagaga i ai o tatou matua, e saili i ai manu ma manuia, mo Samoa nei ma a taeao. O le malae o le faautugatagi, o le malae fai mai e na ai le tupu, pe a maua lona nofoaga. O le malae na tatou moe manatunatu pe tatou te aulia pe leai. O le malae o le tagamamanu a Samoa, i ona upufai o Malo. Manatu lea ua atoa tino o le tama na moe i le ana. Ua laulauila ae poupoutoa e pei o le fale na i Amoa.

Lau Afioga i le Fofoga Fetalai, malo afua faafetai lou onosai. Ua mavae atu vasa sa tatou saili i ai le tamaoiga o Samoa. Sa tatou aputiputi ai ma faafetai i le Atua, i lana foai mo mea ua foai mai mo tatou e tatau mo le aso. Le afu maligi o le atunuu, seia tatou auau maa o le mativa. Se i o tatou manatunatu i le afu maligi o

tagata, o ai lea e tuu mai ai? O outou aao, ma outou lima, Palemene o le atunuu, tatou te omai e lipoi le faasoalimalima lelei. Faafetai i le Atua ua mavae lea ogasami ua uma ona asa.

O le taeao lenei, ua ou manatu e lagona i tino e maniti i pisaga, ma e lagona foi i tino le gatete pe a tu ma vaai i le to. O upu faavae o le Maota lenei, e leai se isi e sili atu, leaga o le Maota lenei, o le poutu toa o Samoa, poutu toa. E faalagolago i ai poulalo o le faigamalo a le atunuu. O ai le faigamalo? O le Faamasinoga, lau Afioga i le Palemia ma le Kapeneta, ma lau Afioga i le Fofoga Fetalai ma le Palemene o Samoa.

O le mataupu lea ua aumai nei, o se mataupu e le faigofie i le lagona o le sui usufono lenei ma le tapuaiga a lou itumalo, leaga o le uluai taimi lenei ua o tatou omai ai e vailiili faavae na fai e o tatou matua. O le lagona faagaetia o le sui usufono lenei, tatou te tutu pea i le toa, tepa i le ata, vaai pe faapefea ona sau ia le tatou folauga.

Silasila, mai le uluai Palemene, e tau mai ia tatou, faasolo mai i uluai Ao o le Malo, Fofoga Fetalai ma le Palemia o le atunuu, e le o faapea o i ai mauili o tagata na i le taimi lenei. O lea tatou te fono talatala, ma e na asaina le gasu o le taeao, ma le faamoemoe o le Maota. Auau o lou manatu lau Afioga i le Fofoga Fetalai, e taatia le Maota ma le folasaga a le Taitaifono. Faafetai i le Taitaifono ma lau Komiti.

O Fepuleai Letufuga Attila, e le tau faailogaina ma taufaailoa sana galuega fai i le atunuu lenei. Silasila le Maota lenei, o le tagata sa tautua tuavae i le sa avea ma Fofoga Fetalai ao avea au ma Sui Fofoga Fetalai. Sa tautua matapalapala i lou taimi faafofoga Fetalai, malie le loto, malie le agaga, ona o lenei tamalii o le atunuu. E le mafai ona galo lana galuega lelei. E le i gata i i lona tauleleia, na ave i o se i tau soalaupule le la foi itu o le vai ma le manaomia o le fesoasoani, e le la itu vai o le Tafatolu o le Faigamalo. E le tau faailoaina ua leva ona iloa e Samoa atoa lona tomai, lona agavaa, ma lona tamaliiaga o se tagata e tumu i le faaaloalo ma le mea lea e tou te saunoa mai ai, o le tamalii o le atunuu.

Peitai lau Afioga i le Fofoga Fetalai, o lea e tuufesili lou loto, ia te au ma lau tautinoga lau Afioga i le Fofoga Fetalai, e mamae le tavae i ona fulu. Ou te le manao i le ia, ae ia ou manumanu i le uega. O i inei e faatulaga ai le mamalu, maualuga, taualoa, aloaia o le Palemene lenei. E faatulaga ai foi le mamalu, aloaia taualoa o le Faamasinoga a Samoa, le afio o le Afioga i le Sui Faamasino Sili ma le ituvai o le Faamasinoga, faapena foi le Afioga i le Palemia ma le Kapeneta.

O le mea la lea e tuufesili ai le mafaufau, ua uma ona fai le faaiuga a le Faamasinoga, maea lau Afioga i le Fofoga Fetalai. O le tatou va faafeagai ai, Tafatolu o Faigamalo, faafealoaloai nonofo ai. E le feaiaai, fetausiai, faafealoaloai. O lea la ua maea ona fai le iuga a le Faamasinoga, sa ou lagona le agaga faafetai lau Afioga i le Fofoga Fetalai, leaga foi na sau le iuga e leai se conviction, leai se conviction. Sa ou manatu, o le tali lea mai le Atua mo lenei tamalii o le atunuu. Peitai, e le i atoa le 24 itula ae fai le apili, o ai na fai le apili lea? Ia ou te le fai atu lau Afioga i le Fofoga Fetalai, o i ina lea ua mafua ai ona tatou toe talanoa i le mataupu lenei. O le a le mea ua toe aumai ai le mea lenei i totonu i inei ae o lea ua uma ona fai le faaiuga?

O le ava lena lau Afioga i le Fofoga Fetalai po o fea e tosi ai le laina? Le va faafeagai ai o le puipuiga o le mamalu o le atunuu, le mamalu o le Tafatolu o

Faigamalo i le Faamasinoga ma le Palemene. Ta ma ta mou i le silasila mai fafo, e pei e faafoliga ua tatou leiloa le mea sao ma le mea sese. E pei ua faafoliga o le agaga ia te au lau Afioga i le Fofoga Fetalai, e manumanu i le taualoa ma lelei ua tatou iloa ua convict Fepuleai i le apili na fai. A na sau lava le Faamasinoga muamua e alu lava e na o le sala tupe, ua magalo mea uma. E leai se isi o tatou e toe faalava, o le faaiuga lena a le Faamasinoga. A lea la ua aumai nei le tonu o le **Court of Appeal**, ua convict, oka, o le mea mamafa lena ia te au lau Afioga i le Fofoga Fetalai. Ua tatou manatunatu e faaali le malosi o le Palemene, ua tatou manatu e tatou te fai atu, o tatou e pule.

Lau Afioga, ia e maumau iumaea i masofa le fa le va faafeagai ai. Lau Afioga i le Fofoga Fetalai ou te manumanu i le Tafatolu o Faigamalo, ina ne i mea ane ua tatou manatu i iumaea ma tatou alolofa ia Fepuleai, ae le se i silasila i le mamalu o le Palemene. O le agaga lena lau Afioga i le Fofoga Fetalai, o alofa na o alofa nei, ua uma foi ona ou faasoa i le uso. Fepuleai ua e silasila mai i le mea lea e tupu ia te au, o tuuaiga ae ua ou faamavae ona o lou alofa i le atunuu, ma tofiga. A o le ala lea ua ou tu atu lau Afioga i le Fofoga Fetalai, e talosaga i lo tatou Palemene, toe tu le too ma tepa i le ata, silasila mamao i le Faigamalo a Samoa. Ua uma na fai le faaiuga a le Faamasinoga ua uma foi ona fai finagalo o le Afioga i le Faamasino Sili ma lana Komiti, ua uma foi ona fai le finagalo o le Loia sili. O le a le finagalo? Vaai i le ogatotonu lemu lea e tosi ai le pule, ina ne i sopo le tai i le eleele ma sopo le pule a o i le pule po ona malepe loa lea o le atunuu. E tatalo atu ai ma le agaga faaaloalo lau Afioga i le Fofoga Fetalai, e manumanu ma alofa i le afioga ia Fepuleai, ae ua ou talitonu ua maea ona fai le faaiuga a le Faamasinoga o le iuga lena e aloaia e le itumalo lenei.

E faamalulu atu Samoa i lau faafofoga, faamalulu atu foi i paolo ma gafa ma latou uma o e tau i lenei tamalii o le atunuu. A o alofaaga molipo e le iloa po o ai e tua i ai le mea lea o le a fai. Ae o le a taatia i le ogatotonu o le Maota lea lo outou finagalo ma la outou tofa saili e uiga i le mataupu lenei, ao le agaga maua luga lena lau Afioga i le Fofoga Fetalai. Ou te lagolagoina ai le faaiuga a le Faamasinoga ua uma ona fai. Ma lou agaga faaaloalo.

FOFOGA FETALAI: Ou te tapa le sui usufono mo Nuu Tu Taulaga i Sisifo.

Afioga FAUMUINA ASI PAULI WAYNE FONG (Nuu Tu Taulaga i Sisifo): E momoli atu le faafetai i lenei aso, i le afio a lau Afioga i le Fofoga Fetalai, afio lau Afioga i le Palemia aemaise foi le sui Palemia, mamalu o le Kapeneta aemaise Minisita lagolago o lena itu. Afifio foi lenei itu, Taitaifono o Komiti aemaise foi le mamalu o sui usufono. O lea foi ua tatou faatasi i inei ma Ofisa Sili o Pulega a Matagaluega taitasi a le Malo, aemaise foi le Failautusi o le Fono Aoao Faitulafono ma le aufaigaluega o lo o tautuaina lenei Matagaluega. Ae o le a taumafai atu se manatu.

O le a tuusao atu se manatu lau Afioga i le Fofoga Fetalai, o lea ua uma ona tatou papae Samoa ma ona mamalu i tulaga ia. Ae ona o le faasaoina o le tatou taimi lau Afioga i le Fofoga Fetalai. I le fuafuaga mai o lenei mataupu, o i inei le Maota fono lenei e fai atu ai Tulafono a le Faamasinoga, ona ave lea e faaliliu ma faauigaina e le Faamasinoga Tulafono, e fau atu i inei i le Fonotaga lenei. O lea la ua uma le galuega ua uma ona faia e le Faamasinoga, ona toe foi lea o se manatu i

le amataga o lenei mataupu ina ua tulai mai. O lea sa taea e isi sui usufono ia, ina ua tulai mai le faamasinoga o toe iloiloga e le faamasinoga mauualalo, na maua ai le faaiuga, e solofua pe leai se conviction. Sa i ai lava le manatu e faanoanoa, ae se paga lea e talia ma le faaaloalo, e ui ina mauualalo le faamasinoga sa fai ai, ae sa talia ma le agaga mauualalo. Ae peitai ina ua toe aafia le ofisa o le Loia sili, ona toe i ai lea o le isi fesili. Po ua faamalieina vaega o le Tulafono i le faaiuga a le faamasinoga e uiga i le faamasinoga mauualalo? Sa i ai lava le faanoanoaga, o le tele o tupe o le a toe alu ai, ma tele le tatou taimi o le a toe alu ai. Ae se paga lea ua aoga foi le tulai mai o le apili sa o tatou tilotilo ma tatou faitau i ai i le faaiuga ina ua aumai, e le i faamalieina vaega uma o le Tulafono i le faaiuga muamua. Ona oo ai lea i le taimi ina ua faamavae le Afioga i le Peresetene, sa tatalo i le Atua se faafetai le Atua o lenei ua faamavae, ua faigofie ai le mataupu. Ae lilo i manatu e oo mai i inei i le Fonotaga lenei.

Lau Afioga i le Fofoga Fetalai, silasila foi lau Afioga, a solitulafono le lautele o le atunuu lenei, e ave i le Faamasinoga maua lona iuga. A solitulafono Susuga i Faafeagaiga, e ave i le Faamasinoga maua lo latou iuga. A solitulafono Ofisa Sili o Pulega a Matagaluega e ave i le Faamasinoga maua le iuga. E faapena foi i sui usufono, o lea o lo o i ai le sui usufono o lo o molia i le taimi lenei, o solitulafono ae ave i le Faamasinoga e maua ai foi lona iuga. Sa faapena foi Minisita, ave i le faamasinoga maua le iuga, e oo i le Palemia o Samoa sa i ai i le isi vaitaimi, na ave ai i le Tulafono molia, ma aveese ma le tofi Palemia lau Afioga i le Fofoga Fetalai.

O lea ua oo mai i lenei aso, ma le faamoemoe o le tatou Fonotaga i lenei aso, taatia ia le Lipoti a le Komiti, o lo o alu lava latou i fuafuaga faale-Komiti, i tulaga e tataua ona iloilo i ai. Ae o lea sa tatou iloilo i le Tulafono ma le faauigaina e le Tulafono o le faamasinoga lenei.

E sao, ua tele galuega lelei i le Matagaluega sa auauna ai i le Malo aemaise foi o i inei i le Fono Aoao Faitulafono a Samoa. Ae faigata ua soli e le Afioga i le Peresetene le Tulafono. O lea la ua oo ai nei le Tulafono i le tulaga lea ua i ai i le taimi lenei. Ae a na faaoga lenei taimi e fai ai nisi Tulafono aua le aoga o Samoa ma lona lumanai, e manaia. A o le faalavelave o lea ua oo mai i inei...

FOFOGA FETALAI: E fia fesoasoani atu i le sui usufono o lo o saunoa, aua e pei e tai taga tutusa lava lau saunoaga ma le saunoaga a le sui faatoa mavae atu nei. Ae e le i taoto i se taotoga malie le tulaga o le faaiuga o le mataupu lea. O le ala lea o le saili mai o le Faavae, o le Faavae la lea e ala i le faatonuga lea, ae le faapea ua faamalieina le Tulafono. O lenei e silasila i ai ua le mafai e le faaiuga ona faamalolo tumau le Peresetene. Ae fai mai le Faavae 68(5), o le a le aveesea se Faamasino o le Faamasinoga Sili mai le tofi, vagana ua faia e Le Ao o le Malo i luga o le talosaga a le Fono Aoao Faitulafono o le Palemene, e aofia ai ia le itiiti ifo i le 2/3, i latou o le lagolagoina. O le Faavae, o le mea la lea leaga o lea e alu i tua a tatou faasalalauga, i faitau sese mai e le atunuu ona faapea lea ua tatou aapa fua i mataupu tau faamasinoga. E leai e supreme le Faavae, o lea la tatou te talanoa i le Faavae lea e fai mai, e fai e tatou le faaiuga. O le mea la lea, se i fesoasoani mai le sui usufono. Aua ne i limataitaiina sese ai e se sui usufono i sana saunoaga le faafofoga tapuai mai a Samoa.

Afioga FAUMUINA ASI PAULI WAYNE FONG. Leai o lea lava e taumafai atu se manatu aua le tatou mataupu, ae o lea ua malamalama, o le tulaga lena, o le taumafai atu lau Afioga i le Fofoga Fetalai. Ae o le a avatu se manatu o lenei sui usufono, i le taimi e fai ai la tatou iloiloga ma le tatou faaiuga. E momoli atu ai le faafetai tele i lenei aso i lau Afioga i le Fofoga Fetalai aemaise o le faafofoga a Samoa faapena foi le mamalu o le atunuu o lo o faafogafoga mai. Manuia le Fonotaga i lenei aso faafetai.

FOFOGA FETALAI: Malo faafetai, tulai mai le sui usufono o.....e pei e manaia le felafoai. Tulai mai le sui usufono mo Faleata i Sasae. Se i tulai mai le sui usufono mo Faasaleleaga Nu 1 Sisifo.

Afioga Hon GATOLOAIFAANA AMATAGA ALESANA GIDLOW: Lau Afioga i le Fofoga Fetalai, ou te muamua lava ona ou momoli atu le agaga faafetai tele mo le avanoa, e mafai ai ona avatu se lagona o le itumalo o Faasaleleaga Nu 1 i Sisifo. E tusa ai ma lenei mataupu taua i totonu o le Maota Fono Aoao a Samoa. E muamua lava lau Afioga i le Fofoga Fetalai, ou te lagona lava lou tulai atu ma le ava ma le faaaloalo. Ou te lagona lou gatete ona o le Fonousu lenei, o le Fonousu a Samoa aoao. Ua autasi i ai sui mamalu mai itumalo taitasi o Samoa. O i foi lea ua tasi i ai Fonotaga taitasi a alii ma faipule mai nuu ma afioaga taitasi. O lea ua filifili mai ai sui usufono taitasi e faaleo lagona ma finagalo o itumalo e pei ona ou tulai atu ai. O le mea lea ou te lagona ai le faaeteete, ou te lagona ai foi lou popoe, e ao foi ona ou tautala ma lou ava ma lou faaaloalo o lo o faafogafoga mai lou itumalo. Aua se manatu e avea ai au ma sui usufono o le itumalo.

Lau Afioga i le Fofoga Fetalai, o le mataupu lenei e le o se mataupu faigofie. O le mataupu foi ou te lagona e le au maua ni avanoa o sui mamalu mai le amataga o le Tutoatasi o Samoa, o lea ua oo mai i lenei taeao, faatoa maua se avanoa e mafai ai ona faaleo ma tautala i lenei lava vaega o le tatou Faavae. Ma o le mea lea, e le soona faaalai ai se manatu. O se manatu sa mafaufau i ai i ni aso e tele, sa tuu foi i luma o le Atua e fesoasoani mai i se vaivaiga o le tagata, ae ia iu mea uma faaalai ai se tofa se faautaga aemaise o le musumusuga a le Atua.

E tolu lava ni mea lau Afioga i le Fofoga Fetalai, ou te fia talanoa i ai. O le mea muamua e pei ona ou faaali atu, o le Fono Aoao a Samoa atoa. O le Fono e sulufai i ai, aumai i ai mataupu ua le mafai ona oo i ai se faaiuga a se tasi lava vaega a lo tatou Malo po o lo tatou atunuu, vagana lava le Fonotaga a le Palemene o Samoa, o lea la e i ai le mataupu lea. E agaga lava se faamatalaga i le fono lava lenei o pulega a alii ma faipule lea ua aotelega i totonu o le Maota o Samoa nei.

O sau faamatalaga lona lua lau Afioga i le Fofoga Fetalai, o lea ua oo mai le mataupu, o le manatu e tulai mai. E so o se mataupu e oo mai i totonu i le fonotaga a alii ma faipule, o le a le tulaga na amata mai ai, ma aiaiga ma oooga ua oo i ai se mataupu. Aua foi lau Afioga i le Fofoga Fetalai, e ese mataupu e lotea i totonu o pulega a alii ma faipule ese mataupu e lotea e le Tulafono. O o mai i totonu o pulega a alii ma faipule, o le fesili, o le a le faasalaga? o le a le tulaga i le Tulafono o le mataupu? Fai mai le upu ua uma ona sala. Liuliu le tofa ma le faautaga i le pulega a alii ma faipule, e leai se tasi e sala faalua.

Ia tatou mafaufau foi i le alofa o le Atua o le alofa e faamagalo, o le a le leaga o le tagata, o le a le agasala matuia e oo i le fasioti tagata, a lea na faamagalo i luga o le satauro o Iesu Keriso. Ma e tolu au mataupu e fia aumai lau Afioga i le Fofoga Fetalai, o mea nei e tolu e tumau, o le faatuatua, o le faamoemoe, o le alofa. A o le sili o na mea uma, o le alofa lea. Ma o le alofa lena e salani ai faaiuga po o totonu o pulega a alii ma faipule mai afioaga taitasi o lo o avea ai tatou ma sui i totonu o lenei Palemene, e oo mai foi i totonu o lenei Palemene, o le alofa e salani ai mea uma.

Ma o se tala lena lau Afioga i le Fofoga Fetalai e molimoli atu ai se manatu i lenei mataupu. E le oo lava se faamatalaga i le Lipoti a le tatou Komiti ua uma ona outou faalogologo ma faafogafoga, ae avatu lava i le agaga e tusa ai ma le mataupu ma le oo mai ai e fai i ai se faaiuga a le Palemene i le Faavae o Samoa e tataua ona tatou agai i ai.

O lau tala mulimuli lau Afioga i le Fofoga Fetalai, ia alofa le Atua ia maua le tofa, maua le filemu e faafoe ai le Fonousu a Samoa aoao. E faapea foi lau Afioga i le Palemia, le Sui Palemia ma le Kapeneta ma le Palemene atoa, ae magalo se leo o le sui usufono mo Faasaleleaga Nu.1 i Sisifo, ia manuia tele lo tatou aso. Faafetai.

FOFOGA FETALAI: Malo saunoa i lau Afioga i le sui usufono mamalu. Tulai mai le sui usufono mo Faleata i Sasae.

Afioga SALAUSA JOHN AH CHING (Faleata Sasae): Faafetai tele i lau Afioga i le Fofoga Fetalai mo lenei avanoa. Ou te tulai atu foi e fai se faamatalaga e fai ma sui o le itumalo o Faleata Sasae aua lenei mataupu ese ma le taua ua opea nei i le Maota. Ma e fiafia tele le agaga ina ua tatou tau i lenei mataupu. Ae le i alulua se faamatalaga, se i ou fai atu lava se faamatalaga e faatauua ai le tulaga faamatai i totonu o Samoa. O atunuu ia o Fiti ma Toga, sa matou talanoa i le isi aso i le fonosaga ou i ai i Niu Sila, matou talatalanoa loa lea i mea nei o matai. Na ou fai atu lea, o Samoa, so o se isi lava e mafai ona matai i totonu o Samoa. Ae o ou qualifications po o au mea e manaomia e avea ai oe ma matai, o lau tautua. E te tautua i lou aiga, e pei lava o le upu, o le ala i le pule o le tautua. Ia, ua tetea latou, ona pei lava ona outou silafia o Toga, a e le soifua mai i le lalolagi leni o oe o se noble, e te le noble lava, e le avea lava oe o se matai. O lou tulaga lava lena e iu lava le lalolagi o lou tulaga lava lena. E faapena foi le atunuu o Fiti, a e le soifua mai i le lalolagi leni o oe o se Ratu, e te le Ratu lava. O qualifications ia o ia atunuu e avea ai ma taitai, e avea ai ma matai i totonu o se aiga ma se faauluuluga o se nuu. Ae faapei i Samoa? Ia o lena. O le auala i totonu o le pulega ma le tofiga faamatai, o le tautua, o le ala i le pule o le tautua.

Ona ou oo mai loa lea i le tatou mataupu o lo o talanoa nei, o lea ua tulai mai, aua o lea ua uma isi faamasinoga e tolu, o lea ua tulai mai le mataupu leni o lea ua lafo mai i totonu o le Palemene. O le mea foi lea, o i lea ua tatou iloa ai, o lo o faagasolo pea le tuputupu i luma o le soifuaga ma le faagasologa ma le tapenaga o Tulafono mai lea taimi i lea taimi, po o fea le Tulafono e tataua, a o fea le Tulafono ua tataua ona toe teuteu. O i lea ua tatou vailiili ai le fesootaiga o Tulafono faa-Peretania ma le tofa ma le faautaga faamatai Samoa, o i lea ua tatou vailiili ai. A tatou mafaufau i le mea lea na tupu lata mai nei lea na tatou suia ai le tatou

Faavae, ua leva ona tatou pepese e faavae i le Atua Samoa, ae sue atu le tusi o le Faavae, e le o i ai i totonu. A o lea na ou maua i le faamatalaga i aso foi a o fuafua mai leni faamoemoe ina ia tutoatasi lo tatou atunuu, sa faapea se faaupuga a e na omai mai fafo i malo aufaatasi, ave ai pea faapena ina ia vave ona pasia, aua foi o nuu la e i o, e i ai le faavasegaga e le tuufaatasia le lotu ma le Malo. E le faapena ona fai, e aveese le Malo, aveese le lotu. O le mea lena, e pei o se fautuaga lena na aumai e i latou na omai mai fafo, ave faapena aua le tuua i ai mea na te i ua faigata ona maua le tou tutoatasi. Ona ave ai lava lea faapena, ma tatou pepese lava e faavae i le Atua Samoa ae le o i totonu o le Faavae. O le isi lena mea e ese le taua.

Na tatou talanoa foi lata mai nei i le tau faavasegaga o Tulafono ma le aia tatau, le aia tatau a le tagata e toatasi ma le aia tatau faa-tagata toatele po o community rights versus individual rights. E i ai le fonu a alii ma faipule e faasala ai se isi pe faatea ese ai ma le nuu, ona aumai lea i totonu o le tatou faamasinoga. E moni o la e faatea ma le nuu, ae le alu ese ma totonu o le nuu. Ua taofi ma faataua individual rights. O mea la ia, o tulaga ia faapea o lea e alu lava, o lea e tapena lava, o lea e ola lava, o lea e soifua lava, o lea e alu lava le mea lea e tatau ona tatou mafaufau i ai ma teuteu ina ia o talafeagai ma le tatou aganuu. So you still... its a living process, e le mate, e le gata foi i i, e tatau ona develop pea ma fesuisui mai lea taimi i lea taimi ina ia faamalieina uma itu e lua.

O le tatou Tulafono lea na faavae ai lo tatou Malo, o le Tulafono na aumai mai fafo, lea e oo mai lava i le taimi leni e le o mafai lava ona fesootai mea uma ma le tatou aganuu. O lona uiga o lea lava e develop, its a living process, o lea e tatau ona faatino. Faafetai tele i le tulaga na oo i ai le faamasinoga, faafetai i le Susuga i le Loia Sili ma le Ofisa i le faiga o le Tulafono leni ma le mataituina o mea nei, leaga o le Tulafono a o le Tulafono. O le Tulafono foi, e faasasao a le alu a le Tulafono e le pio, po o ai lava e lavea ai e sao lava. E le mafai ona alo le Tulafono i so o se tagata. O lea la ua uma le tulaga lena i faamasinoga ia e tolu, a o lea ua lafo mai i totonu o le tatou Palemene. I lau la tilotilo i ai i leni mea, o lea ua lafo mai i le Fonu a alii ma faipule Aoa o Samoa se i filifili i ai le tofa ma le faautaga. Ia e ese foi la le faiga o sailiiliga ma faasinoga faaleaganuu ia, e vaai i le va faa-le-tagata, e vaai i le va nonofo ai, e vaai foi i le vai tagata, po o le a le vai tagata.

FOFOGA FETALAI: Toe lua minute o le sui usufono.

Afioga SALAUSA JOHN AH CHING: O le vai tagata lena e sau ai mea ia o le ala i le pule o le tautua, e au i le tauola, e au foi i le fagota. O le vai tagata lea ou te manatu, o i tonu le isi mea lea e afaina i le mataupu leni e tusa ai ma le Lipoti a le Komiti, le vai tagata lea, e i ai le va nonofo ai, e le sopo atu le isi vaega i o i le isi vaega. Ua uma ona i ai alii ma faipule, ua uma ona i ai faletua ma tausi, ua uma ona i ai tamaitai ma saoa, ua uma ona i ai le malosi o le nuu, e le fesopoai, ae a? E faapefea? E au i le tauola e au foi i le fagota, e i ai foi lo latou taimi e sau ai, e i ai foi lo latou taimi e taunuu ai i luga. A o le a? Tautua ma fai uma, faatino uma tulaga e tatau ona fai.

Ona o le taimi ua puupuu, o le isi mea taua lea ou te faalogologo atu i ai, o le faaleleiga lea i le va o le Afioga ia Fepuleai ma le Afioga foi ia Leota le sa aafia i

le mataupu lenei. O lea foi ua aumai lava i totonu o le saofaiga lenei a alii ma faipule, o lea ua uma ona fai le faaleleiga e tusa ai ma le Lipoti, o lena foi ua aumai le finagalo o Leota e manao e faaauau Fepuleai i lana galuega. O i la e sasaa i ai le tofa ma le faautautaga, e tatou te fua foi i le agasala po o le a le mea na tupu. E faapena ona fai. A o tulaga faapena, e mulimuli ane ona fesili lea o alii ma faipule. E a le tulaga o le tama lea? O se tagata e tautua lelei? O se tagata e aoga? E faapena, e fua i ai le faaiuga a alii ma faipule.

O le mea lea, o le a faauma atu se tautalaga i lenei itula lau Afioga, faafetai tele i lau Afioga i le Fofoga Fetalai. E avatu foi le faamalo ma le faafetai i le Komiti sa sailiilia lenei mataupu, ua faalogologo lava ma le totoa analeila ua atoatoa lelei sailiiliga a le Komiti, ua fialia ai foi ua manino foi lenei mataupu i lau faalogologo ina ia fesoasoani foi i mafaufauga aua se faaiuga e tatau ona fai.

Faafetai atu foi i le Matagaluega o Faamasinoga ma la outou galuega o lo o fai, le Loia Sili, aua o lo o faatino lava la outou matafaioi e tusa ai ma uiga o le Tulafono. Ma o lea e faapea atu ai se manatu o lenei itumalo, e lagolagoina pei ona tuuina mai le Lipoti a le Komiti mo nei sailiiliga. Faafetai tele mo lou avanoa.

FOFOGA FETALAI: Faafetai. Masalo ua maea sui usufono e fia saunoa. Se i tutulai mai lava sui usufono e fua i ai lo tatou taimi faigaluega, ona e i ai le manatu o le tatou aso mulimuli lenei. Se i matau ifo, tasi, lua, tolu, fa, aua e tofua lava ma le lima minute, e vave foi.

Ia, se i tulai mai le sui usufono mo Faleata Sisifo. Faamolemole tulai mai e saunoa.

Tofa LEALAILEPULE RIMONI AIAFI (Faleata Sisifo): Faafetai i lau Afioga i le Fofoga Fetalai mo le avanoa. Ou te talitonu o le taimi lenei o le taimi o Faleata, ona o le lupe tutasi lea a Faleata lea faatoa maea ona saunoa, a o le mamoe lenei a Faleata.

O le mataupu lau Afioga e pei ona saunoa i ai le tele o sui usufono ma le Afioga i le Palemia ma tatou uma ma le Taitaifono i lenei taeao, e taia pea i ou taliga faapea o se mataupu ogaoga, o se mataupu taua, o se mataupu faatoa tupu i totonu o le Palemene o Samoa. E moni, e faamaoni. Ae i lou sui usufono ma lou tagata, o se mataupu pito sili lenei, a fua i au faaiuga e fai i le Palemene lenei ma lou tagata, o se mataupu pito sili ona faigofie ona fai i ai lau faaiuga. Faigofie. A fai sau faaiuga lau Afioga, e te faia le faaiuga e te moe lelei ai i le po ma fialia lou loto. Fai mai tagata, òLeala, po o fea e te i ai e te fialia lou mafaufau, e te ata i taimi uma.ö O lau tala i ai, òO le tagata e mama le loto.ö A fai lau faaiuga, fai le faaiuga i lou loto, tatalo i le Alii, a e moe i le po, e te taagulu i le po atoa, e leai se mea e lualuagia ai lou mafaufau. Na pau lenei o le mataupu, o le mafuaaga lava i le faigofie o lau faaiuga lau Afioga, na pau lenei o le mataupu na molimau i ai le Sosaiete a Loia, Loia uma o Samoa, molimau i ai le Faamasino Sili, molimau i ai le sa Faamasino Sili, molimau i ai le sa Loia Sili toe molimau i ai le Loia Sili o i ai nei. O ai la o aisili? O le faigofie lena ona fai o lau faaiuga. E le gata ina aumai iinei i le Fono a le Palemene, o tatou e fausia ma faia Tulafono, a o lea ua uma ona faaali i ai finagalo o i latou e faalailiaina le Tulafono, ae le gata i lea, ua fai i ai ma le faaiuga a le Polofesa o le Tulafono. Ua ou le iloa la po o ai ou te toe fesili

i ai. E na o le Atua la e tatou te fesili i ai. A ua uma, o le faigofie ia lau Afioga o le mataupu.

Ua uma le faamasinoga o Fepuleai, uma na fai le faamasinoga, uma na fai le faasalaga, uma na totogi lana sala, ua tutusa lava ma tatou. Leai se noanoataga o i ai. Ua **complete**, ua uma atoa le **legal process**. O le mea e le fiafia ai lou loto, o lou mafaufau lau Afioga, **Democracy is alive and well in Samoa, and that's the rule of law**, lea tatou te pisa ai. Na ala la ona tatou omai iinei ma tatou talanoa i le mea lenei, o le rule of law. Aua o le Faavae lea e aumai. Pau le mea lea e aumai i le Palemene, ma fesili mai, po o le a se tofa ma se finagalo a o se moe pe toe faaaau Fepuleai i lana galuega pe leai, pau lava lea. Ae o le faamasinoga ua uma.

Faafetai foi i le Loia Sili ua apili, ua matua complete ua uma le faamasinoga. Na ou tilotilo loa lea i le lipoti, aumai ai ni nai mea e fau ai lou manatu. Ou tilotilo i le faaiuga a le **District Court**, faaiuga o Faamasinoga Maualalo, tele le faaiuga, matua **detail**. Tasi lava le mea na ou aumaia e 92 o le faaiuga, pito i tua, faapea mai le Tamaitai Faamasino, a faia le faaiuga lea ia te oe ma molia ma faamaonia lou faasalaga ma e le toe faaaau i lau galuega, e leai se eseese ma se faasalaga o se tagata faasalaga oti, a **death sentence**. Ioe o le a faamuta ai o lea lelei o lau galuega.

O lona uiga, ua tali le isi vaega o lau fesili, e faaaau ma le le faaaau, o lea ua toe tali e le Faamasino e tatau ona faaaau. Oo mai i le faaiuga a le Appeal, o le a foi o le Court of Appeal, Faamasinoga toe Iloilo, o lena e manino lava le faaiuga a le Court of Appeal. E leai se fesootaiga o le faasalaga lea ua i ai ma le conviction ma lana galuega, e ese lava galuega. O le toe tali lena faamautu o lau fesili lava ia te au, e le o tagofia lava galuega a le tagata, vae ane... e faaaau pea. O le faigofie lea lau Afioga o le fai o lau faaiuga. E faigofie ia, lea ua aumai uma mau, faamasino, aumai mea uma, e tilotilo ma liuliu, matautia le mea. Ao le fesili la lau Afioga, e i ai ni tagata na nofosala i le falepuipui o mai toe avea ma sui usufono o le Palemene nei? O le tali ioe, e i ai. E i ai ni tagata na falepuipui toe o faifeau? E toatele, e toatele.

Sa i ai le mea faapea na tupu i le isi Faamasino o le Faamasinoga Maualuga i i. Ou te le fia taua le suafa, e tutusa lava mafuaaga. Ae sa mafai ona teuteu, tonu na fai, ae o le a le mea o i ai? O la lava e faamasino e oo mai i le aso. O la e Faamasino e oo mai i le aso, o la e faaaau ma faaaoga e le Atua ona tagata.

O le Atua lea e tapuai ai Samoa lau Afioga, o le Atua tuu avanoa. O le agasala o le mea uma la tatou. O le salamo o lau filifiliga lea e te faia. Ao le faasala o le tagata, e le o se mea lena a oe, o le mea a le Atua. E na o le Atua e na te faasalaina le tagata. Lea, e taua... ua faamagalo e le na tupu ai le faalavelave Fepuleai, faamagalo. O le a la le isi mea a tatou e fai?

FOFOGA FETALAI: Toe lua minute o le sui usufono.

Tofa LEALAILEPULE RIMONI AIAFI: Faafetai i lau Afioga, ua uma foi le aano o le mea. Lea ua faafofoga mai lou itumalo ma Samoa atoa i le mafuaaga e ala ai ona faigofie le faaiuga a Leala, i lenei mataupu. Faafetai ai i tuua na taatia mai, na iu ai lea o au upu faapea lau Afioga, o le lauga a le matou faifeau i le vaiaso na tea nei, lauga i le Isaia e 32. O Isaia na valoia le Mesia, ua maea le Mesia ua afio i le lagi lea tatou te faatalitali le toe afio mai. Ae na lauga ai le

faifeau, faapea mai, faitau le Isaia e 32, faapea mai, -O le finagalo o le Atua ia avea tatou ma lafitaga, maluapapa mo i latou e moomia le fesoasoaniø Ia avea i tatou ma maluapapa, tafe atu ai le vai o manuia.

O faaiuga ia tatou te faia, e tumau e faavavau, e fesili i ai taeao, fesili i ai. Ma o lou talitonuga o le faaiuga lenei e le gata i Samoa. O le a fai ma lesona i atunuu uma o le lalolagi. Lesona e ao atu iinei i Samoa, leaga o le Samoa a tusi lana Tulafono, e le tusia e tau ina tutusa tagata uma. A uma ona tusi le Tulafono, ona tilotilo lea i ai, pe feaiaai ma lona talitonuga faakerisiano. Afai e feaiaai ona taatia lea, e tusi Tulafono, mautinoa e o faatasi ma lona talitonuga faakerisiano ma lona talitonuga faaleaganuu.

Ia manuia le faamoemoe, ou te lagolagoina i le agaga fiafia ma le agaga loto maualalo, le fautuaga a le Komiti, e toe faaauau le Peresetene e aoga, aua Samoa, faafetai.

FOFOGA FETALAI: Malo, faafetai, ou te tapa ma le faaaloalo le sui usufono mo Falealili Sisifo.

Tofa AUMUA ISAIA LAMEKO (Falealili Sisifo): Lau Afioga i le Fofoga Fetalai, faafetai mo le avanoa i lenei itula o le aso. E fai foi se manatu e faatatau i le lipoti a le Komiti, ua taatia i lumamea o le Palemene lenei. E momoli lau faafetai e tusa ai ma lenei lipoti ua aumai. E i ai le manatu, e fia fai se manatu ina ia faapena ona ave i ai le faataua i le faatofalaiga a le Komiti e tusa ai ma lenei mataupu.

E pei ona faaalua e le tele o sui usufono, e le faigofie ae faigata. Aisea? E faigata ona o le tulai mai o lenei mataupu, lea ua fai i ai le faatofalaiga a le Palemene nei. E avea ai au e fai ma sui usufono o si ou itumalo, le Paia ia Alalagafa Lalonofo o Tuafale, Tauaga Eeseese i Falealili, tapuai maia, se i fai se sao e tusa ma lenei mataupu.

E tolu vaega e mafai ona ou vaevaeina, e faamatala ai le aoga ma le taua o lenei mataupu. Silasila i le tusi a Ioane 8:32 o lo o faapea mai, -E iloa foi e outou le mea moni, e tuusaoloto foi outou e le upu moniø Ia musumusuina e le Agaga Paia, ina ia tapena ma faaleo lo tatou sao i lenei taeao. O le a le uiga o le mea moni e saoloto ai oe? O le talatalanoa, talatalanoa i le faasinomaga ma le faataua o le aoaoina, ma le talitonu i le mea e moni. O foliga vaaia o le iloa o le mea moni ma talitonu, ina ia mafai ona fai se tonu fai i lenei mataupu.

O le vaega muamua lau Afioga i le Fofoga Fetalai, e fia oo se faamatalaga i le tulaga lea sa taua ai le pulega a alii ma faipule. E leai se eseese o tatou, e tatou te faalupe o tatou o le Palemene lenei, o lupe na faia mai i le fuifui. E ui lava sa vaoseese, a ua fuifui faatasi i le alofa ma le agalelei o le Atua. O Tulafono a Alii ma Faipule ma ona Teuteuga talu ai nei lava, o lo o faataua ai le tuu avanoa, tuu avanoa o alii ma faipule i le tagata agasala. Aisea e tuu avanoa i ai? O le Teuteuga o le Tulafono ina ia mafai ona tali atu le tagata agasala, i le saofaiga a alii ma faipule o nuu taitasi, ina ia mafai ai ona tali i eseese, o le aiatatau taitasi, ma le aia lea e pei ona taua e pei o le community rights.

Ia i lou lava talitonuga o pulega a alii ma faipule, o i i o lo o i ai le tofa sasaa, le tofa loloto e talatalanoa ma fetuutuunai muniao, ao le iuga lava o se mataupu, o lo o i ai vaega taua o le Tulafono o lo o faapea mai ai, -a mafai ona maua le gatasi o

finagalo i se mataupu, o le iuga lenaø E pei ona taua... fai mai se tasi o muagagana, afai e te agasala, e tatau ona e faamagalo atu i lou tasi o uso ua agasala, aua a e le faamagaloina, e le faamagalo foi e le Atuaø E faapei o tatou faiganuu, e tuu avanoa i o tatou tagata, ia ola le tagata.

Ua maea le iuga a le Faamasinoga, e faatatau i lenei mataupu. O lou talitonuga lau Afioga i le Fofoga Fetalai, o le tulaga lena e tatau ona i ai. Ae ia tatou tuu avanoa, tuu avanoa o lea ua uma le faasalaga faalemalo, a tuu mai i le tatou faiganuu lenei, o lou talitonuga, tuu le avanoa i le tagata e aoga.

Lau Afioga i le Fofoga Fetalai, o le manatu lea e tusa ai ma lenei mataupu, e lagolagoina ai le faaauauina e pei ona faatulai mai e le Komiti, faafetai.

FOFOGA FETALAI: Malo, faafetai, ia see mai i le sui usufono o Aleipata Itupa i Lalo. E te le fia saunoa a? Ia se i see atu la i se isi sui usufono. Ia se i tulai mai le sui usufono o Anoamaa Sasae. O lea ua aumai le lisi o i latou e fia saunoa, tulai mai Alaiasa. Ia ave ia le faaaloalo i le Alii Matua. Ia Gagaemauga Nu.2.

Afioga Alaiasa Muagututia Moefaaouo Malagaitutogiai Sepulona Moananu (Anoamaa Sasae): Manuia lau lauga Saleaula.

Tofa Hon FAASOOTAULOA PATI TAULAPAPA (Gagaemauga Nu.2): Faafetai lava. Faafetai i lau Afioga i le Fofoga Fetalai, fia maua foi se avanoa o lenei itumalo e avatu ai se sao aua le mataupu e pei ona tatou soalaupuleina i lenei itula o le aso.

Ua leva lava ona faalogologo lenei itumalo ma faafofoga i saunoaga ma timaiga i sui usufono mamalu o lenei Fonotaga. Ae sa ou tulimatai lava i tulaga o le auga o le faamoemoe ona ou manatu ai lea lau Afioga i le Fofoga Fetalai, e muamua lava ona tapui le tapu a Tupu ma ou faapoipoi lilia faaalofisa o tupu na i malae o le vavau. E pei foi ona silafia o lo o faafogafoga mai si ou itumalo, o lenei mataupu o soalupuleina e le faigofie. Ae o lenei foi itumalo e le nofonofa ai, ae e pei lava ona ou tulai atu, ou te faaeteete, ma ou popoe, i tulaga aua upufai o Malo.

O Samoa ua uma ona tofi, e le o se atunuu taliola o le atunuu ua uma ona tofi, soalaupule. Ua i ai ona tupu, ua i ai ona tamalii, faleupolu ma tofiga i tulaga o upufai a Malo. E lagona lava e lenei itumalo le agaga faafetai. E leai lava se faanoanoa o lenei itumalo, o lo o tapuai mai lou itumalo. O le a lava le mea e oo i ai se tofa ma se faautautaga, ua malie lava saunoaga ma timaiga e oo foi i le Lipoti a le Komiti e pei ona tofia, o lea ua faafofoga le itumalo. Ae e pei lava ona... i le amataga lava o lenei mataupu, sa saunoa i ai le Afioga i le Taitai o le Malo, õo le ua iloa le mea e tatau ona fai ae le faia, o le agasalaø. O itu ia e faaeteete tele i ai le itumalo lenei. O itu foi ia o lo o faapena ona nofo tapuai i ai le itumalo lenei. E le faia i se loto o se sui usufono mamalu nei, e fesili lava i lou itumalo, o lou itumalo foi na aumaia au e fai so latou sao i tulaga o upufai o Malo. O le mea lea ou te faafetai, faafetai lava i le Atua, o mea uma lava tatou te faia e fesili i le Atua. O le sese ma le sao, o le moni ma le faamaoni, o le Atua lava o lo o soifua. Fai mai le Atua, "ou te le tuua outou e pei o e ua matua oti, ou te i ai ia te outou i so o se mea tou te i ai". O le a le mea tou te fesili mai ai, ou te faafofoga atu ma ou tali atu, i lau amiotonu ma le mea moni. O le mea foi lena e faafetai ai lenei itumalo, o lena e faafogafoga mai lou itumalo, o la e tapuai mai, tatalo mai

leaga o le tamalii o lou itumalo. O upu foi e masani ai Samoa, e i ai lava tagata e nofo i le matuatata, a saunoa loa ua faapena ona faafofoga i ai le mamalu o alii ma faipule o le nuu.

O le mea lea ou te faafetai atu ai i sui mamalu uma o e sa latou lagolagoina le tamalii o lenei itumalo. O lou lava talitonuga o lo o i le Atua le tali o mea uma. E leai lava ma se mea e popole ai le sui usufono lenei, o le a lava le mea tou te finagalo i ai, ave i le Atua mea uma, o Ia e tali i soo se manaoga.

Soifua ma ia manuia.

FOFOGA FETALAI: Faafetai. Talu ai o le manatu o le Nofoa, e pau lea o le tatou galuega e fia faamaea i le aso. E manatua foi e i ai nisi o galuega o lo o faapena ona faamuli mai i se taimi o le aoauli nei, ona tatala lea ma faapena ona auai uma le Palemene, aemaise le Palemia mo le faamoemoe, e pei ona i ai le fuafuaga i le aoauli nei. Ae ui i lea ou te tapa lau Afioga i le Palemia mo se lafo ina ia faapena ona usitaia ma faaauau ai la tatou galuega.

LAFO MO LE TOE FAAAUAUINA O ITULA FONO

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga ou te tulai atu ma le ava tele e faatu le lafo, *Mo le toe faaopoopoina o le taimi o le tatou Fonotaga seia maea ona lauiliuina le mataupu o lo o talanoaina nei.*

Ma o le isi lea auala lau Afioga e faaalua ai manatu o le tatou Palota. Ou te ofo foi i le umi pea o nei mea. O le lafo lena lau Afioga.

FOFOGA FETALAI: Ua faaluaina mai le lafo, ia faapena ona faaauau le tatou galuega seia maea saunoaga ma faamutaina ae ua i ai foi ma le fautuaga.

Faaluaina e le Minisita mo Tina ma Tamaitai, Atinae o Nuu ma Afioga ma Agafesootai.

FOFOGA FETALAI: Ou te tapa lau Afioga i le sui usufono mamalu mo Anoamaa Sasae. Masalo o lea o le a tofitofi, e lua lena Itu lua lea Itu, ona tatou o loa lea i le tatou Palota.

Afioga ALAIASA MUAGUTUTIA MOEFAAUOUO MALAGAITUTOGIAI SEPULONA MOANANU: O le a taoto ia faamaene o le tai loloto paia ma sa o le atunuu. Atonu foi o lea ua uma ona paepaeulufanua le taeao ua sola. Ae ua tulai atu ma le faaaloalo ona o le manumanuga foi i le tulaga o le tatou taimi.

O upu masani lava a Samoa, a numi le fau pe lavelave foi le upega, e faapena ona talatala. E pei ona i ai le faamoemoe o le aso. A silasila ma tagai le atunuu i le mea ua tupu, e pei lava o upu masani. "E a ulu tafega ae selefutia ai Vaisigano". E a latou e fai ae o lea ua faaauagase ai le paia o le Maota, ae a le faafofogaaga a Samoa. E a le uga e tausii ae tigaina ai le atigi. O lau lea vaavaai i lenei mataupu.

E ui lava ina ogaoga e pei ona saunoa nisi, ae faafetai i le Palemia i le aumai malamalama o le mataupu, e le o natia se mea ae folasia i malae se i sasaa i ai le tofa, sasaa faaoti le utu a le faimea, aua le tofa saili a le Maota lenei. O le Maota foi lenei, e pei lava ona malie o tupu ma tamalii nei o le atunuu. O lea ua aumai la latou tofa, ou te talitonu e faigofie lava le tatou mataupu.

E pau lava o lea i lau matau i aga, o le upu lea e i ai i le Faavae o le misbehavior, e pau lava lea o si upu e ogaoga lona tau i lau matau. Ioe, o lea ua faaupu e nisi o le amio paaa, le amio le pulea. E leai la se mea o le a tau nana ai le tiute o le Palemene, pau lava lea o le fautuaga ona ua amio paaa le sui, e pei o aga a le Faavae o lo o i ai. Se i vagana la ua finagalo le Maota e sui le Faavae ona ou talitonu lea e mafai ona faaumiumi le tatou talanoaga i lenei mataupu. Ae o lea ua aumai manino, e gaulofa tatou i so o se tamalii o le atunuu. E tele le gaulofa, silisili le oga.....e pau lava lea o le upu, nei matau mai le atunuu. O fea o i ai le tofa, fea o i ai le faautaga. O lau fautuaga, e pei ona fai atu e le umi se faamatalaga, tatou vaavaai toe iloilo upu ia o le Faavae. Ona aumai lea o le mataupu toe soalaupule e le Maota. Faafetai i le Komiti i le latou galuega, ae leaga ua i ai upu ia ua aumai i le lipoti ma fautuaga a le JSC, e sau ai lava le upu lea. Ua tatou talitonu e le oge tagata foi le atunuu, e le oge tagata le Atua. Ao upu ia a le Atua i mea nei o Faigamalo. "Saili muamua le Malo o le Atua ae pipii mai ai ma lana amiotonu". O le mea sili lea ona taua tatou te o e saili, o le amiotonu. O Iesu fai mai e a, e aumai ai le alofa tunoa ma le mea moni. E eseese lava mea ia, o i ina la e tatau ona tatou galulue i ai ia atagia mai le mea moni ma le faamaoni, i faaiuga tatou te faia.

Lau Afioga i le Fofoga Fetalai, o le matou lea tuualalo, tolopa le mataupu toe lotea le Faavae ona toe aumai lea o lenei mataupu e toe iloilo totoa, aua le agai i luma o le tatou galuega. Ma le agaga faaaloalo manuia la tatou Fonotaga.

FOFOGA FETALAI: Faafetai saunoa. Ou te tapa lau Afioga i le Sui Palemia.

Afioga Hon FIAME NAOMI MATAAFA: Faafetai lava i lau Afioga i le Fofoga Fetalai mo le avanoa. Ma ua matau atu i le lafo mo le faaauauina o le tatou galuega e pei e foliga mai e faamuta la tatou mataupu lenei, masalo e fuafua i le isi tuatuagia o le Malo pe a ta le 2:00. Ina te i ua le toe maua se avanoa, ae taua lenei mataupu sa faapea foi se i saausi lelei faaaliga o finagalo ma taofi, e tautulituli atu ai se taimi. Ae ona ua faatu le lafo i le Afioga i le Palemia, e lelei ia le fai atu o sa matou tala, te i ua le maua se avanoa. Ona fesili lea o le itumalo, po o fea le mea na i ai le sui usufono mo Lotofaga.

E matauina i le talanoaina o le mataupu o lea ua tatala le avanoa faaali ai finagalo o le sui usufono ia. Ua le saisaitia i faiga faa-Falemene i itu Faaupufai. Ae ui i lea, lau Afioga i le Fofoga Fetalai, e le mafai lava ona aveesea ai, o le lafo o lo o i luma o le Palemene, o le lafo a le Malo. Ao ai le Malo? O lea, faasolo atu faapea, le Kapeneta, Minisita lagolago po o le pulega foi. O le itu foi lea a le Malo, o lo o i ai le vaega o lo o faatinoina le galuega, lea e i ai le Ofisa o le Loia sili ma Leoleo.

Lau Afioga i le Fofoga Fetalai, o le autu o sou manatu, o le pulega faa-le-tulafono. Na o le pau lava lena o le mea o lea ua tatou nonofo ai i i. Saini o outou tuua ma o tatou matua e faavae le Malo o Samoa i luga o Tulafono. E le faia i se

finagalo o se tasi, po o se vaega po o ai lava. E fuafua mea uma i luga o le Tulafono. O le isi autu lau Afioga o le manatu, ou te lagolagoina le mau a le Malo. O le a le mau a le Malo? Ia faamuta le tofiga o le Peresetene o le Faamasinoga o Fanua ma Suafa. Ma i le faatu atu o le lafo, o le mafuaaga ona o faaiuga ua uma ona fai e le Tulafono. E tautala i le ava ma le migao e tatau ai, o le lafo lea ua faatulaga i le taeao lenei, e fai i ai la tatou filifiliga. O le lafo ua fai i luga o aiaiga o le Tulafono Faavae. O le a le vaega lea? O le 68(5) e le mafai ona aveesea se Faamasino o le Faamasinoga maualuga po o le Peresetene o Fanua ma Suafa vagana ua fai i ai le finagalo o le Maota lenei. O lea la ua aumai le lafo a le Malo, ma i le faaupuga o le lafo a le Malo e ta'u atu ai foi i ina le feau, o le mea lena o lea e tu ai le Malo, e faamuta. Ma o au o le sui o le Kapeneta e le mafai ona ou alu ese ai ma le faaupuga o le lafo lea e faamuta.

Lau Afioga i le Fofoga Fetalai, a outou afioga i sui mamalu o le Palemene, o lona uiga ou te matua teena. Ou te matua teena le Lipoti a le Komiti, e le gata e tulaga ese ma le lafo ua faatu atu e le Malo, ae e i ai ona mafuaaga. Ma o mafuaaga nei lau Afioga ou te teena ai le lipoti a le Komiti lenei. Ou te teena le mau o lo o aumai e faapea o le soligatulafono a le Peresetene, e le i faia i totonu o lana galuega faa-faamasino. O le fesili lau Afioga i le Fofoga Fetalai, a na ta le ulu o le Leoleo po ae oti, e loto lava i ai le Maota lenei e faaauau? Aua o le mea moni, o le tauave o le mataupu lea, e i ai ona ooooga, pe ua faapea atu le Maota lenei, e taga, e taga i Faamasino, fasioti tagata, toso teine, gaioi. O a uma isi mea, ona e a? Ona e le i faia lana soligatulafono i totonu o le faatinoga o ana galuega. Ae le o le fesili lena, o lea sa talanoaina e le Faamasinoga toe talosaga. Ioe, o la e fai mai e le i faia sana soligatulafono faalegaluega, a o le afaina o le vaaiuga o le mamalu o le tofi i le gaioiga ma le soligatulafono lea. O le mea lena na fai i ai le faaiuga a le Faamasinoga toe talosaga. O le mea muamua lea, lau Afioga i le Fofoga Fetalai.

O le mea lona lua, ou te ofo i lou taofi faa-sui usufono, lau Afioga i le Fofoga Fetalai, i le aumai e se Komiti o le Palemene se faaiuga a se faamasinoga maualalo atu, e finau ai lana mataupu, a o lea ua taatia le faaiuga o le taunuuga o Faamasinoga, o le Faamasinoga Toe Iloilo. A fai loa le faaiuga a le Faamasinoga Toe Iloilo, ua faaleaogaina, faaleaogaina uma isi faamasinoga ua fai. O le a le faaiuga? Faamaonia le soligatulafono.

Tofa Lealailepule Rimoni Aiafi: Lau Afioga i le Fofoga Fetalai...

Afioga Hon FIAME NAOMI MATAAFA: A o le oto mai e se Komiti o faipule o Komiti Faitulafono se mea faapea e sili atu i lo latou finagalo le faaiuga a le Faamasinoga Maualalo, a o lea ua taatia le faamasinoga maualuga ua tatou faatupuina se mea maoae.

FOFOGA FETALAI: Malie lau Afioga i le Minisita....

Tofa Lealailepule Rimoni Aiafi: Lau Afioga i le Fofoga Fetalai, o se mea e fia faasao faamolemole lau Afioga e tusa ai ma le saunoaga.

Afioga Hon FIAME NAOMI MATAAFA: O e faatagaina lau Afioga?

FOFOGA FETALAI: Ia, ona o la e ua tapa mai lou suafa ona ou faapea lea atonu...

Afioga Hon FIAME NAOMI MATAAFA: E leai e mea o sese i lau faamatalaga lea e fai.

Tofa Lealailepule Rimoni Aiafi: O le mea fia faasao lau Afioga i le saunoaga ona o lea e manino mai i le saunoaga ua aumai le faaiuga a le Faamasinoga Mauualalo. Lau Afioga, o lena e manino mai i ina ma le faaiuga a le Faamasinoga Mauualuga Toe Iloilo o lena e aumai faatasi mea e lua, e le o tuua le Faamasinoga Mauualuga ae aumai na o le Mauualalo. O lena e aumai faatasi mea e lua. Ma lou faaaloalo lava. Leaga o la e faafofoga mai le atunuu, o lea e i i tatou Lipoti. Faafetai.

FOFOGA FETALAI: Malie le sui usufono, o lea ua manino lou finagalo sa e taumafai mai. Se i tulai mai le Afioga i le Minisita.

Tofa Nafaitoa Talaimanu Ketii: Lau Afioga i le Fofoga Fetalai, pe maua se avanoa o lenei Komiti.

Afioga Hon FIAME NAOMI MATAAFA: E faaauau atu pea lau mau lau Afioga i le Fofoga Fetalai, o le saunoa mai o nisi o sui usufono o le Maota lenei i le tatou va ma le Faamasinoga i le agai i luma, ou te fai atu lau Afioga i le Fofoga Fetalai, a mafai ona faamauiina i totonu o faamaumauga o le Palemene lenei e sili atu i le Palemene lenei se faaiuga a se Faamasinoga Mauualalo i lo le Faamasinoga Mauualuga, o le a le filemu lea tatou te talanoa i ai? O le a le saogalemu lea tatou te talanoa i ai? E leai se mea faapena e maua.

Lau Afioga i le Fofoga Fetalai, o le isi vaega ou te teena ai le Lipoti a le Komiti lenei...

FOFOGA FETALAI: Ou te faamalulu atu i lau Afioga i le Sui Palemia ona o lo o tulai mai le Taitaifono o le Komiti, ae fai foi si a latou eseesega o finagalo e pei ona faaalua. Se i faamalamalama mai le saunoaga.

Tofa Nafaitoa Talaimanu Ketii: Ua taliga e fialogo le tala e fai i le mauga i Salafai i le saunoaga a lau Afioga i le Sao Faapito, lau Afioga i le Sui Palemia, o le sui usufono foi o le itumalo o Lotofaga. E i ai le manatu e le fia faalavelave, peitai o le taua o le Komiti ma lana faaiuga ma lana fautuaga, lau Afioga i le Fofoga Fetalai, ua ou tulai atu ma le faaaloalo tele e tatau ai ou te fia faamanino ai le tulaga lea. O le faaiuga o le fautuaga a le Komiti lenei, o lo o faavae lava ma sosolo i luga o le iuga ma le faaiuga a le Faamasinoga o Talosaga Toe Iloilo, la e lava e talanoa i le tulaga o le 68(5), e faapea foi la i le Tulafono o Fanua ma Suafa 1981 Vaega 26(d). O le tulaga i le faamasinoga, e le o i ina lea e agai i ai. A silasila totoa lava i le mafuaaga na mafua ai ona taunuu lenei Komiti i lana fautuaga i le Maota lenei, o lena e manino ai le mata o le vai. Na ona ou toe tulai atu faapena, e le fia faalavelave i le saunoaga matagofie.

FOFOGA FETALAI: Malo. O lena ua manino le tulaga lea. Se i toe tulai mai lau Afioga i le Sui Palemia.

Afioga Hon FIAME NAOMI MATAAFA: Faafetai lava i lau Afioga. Sa le faalavelave foi i le saunoaga umi a le Taitaifono o le Komiti. Semanu a na maua foi lea avanoa mo i matou, ae peitai, na o le 15 minute. Lau Afioga, o lea e i ai i totonu o le Lipoti lena le feau lea o le faagasologa o faaiuga a le Faamasinoga.

Ou te fia tautala i le Vaega 15 o le Faavae, aia tutusa a tagata i luma o le Tulafono. O lea e faapea mai le Lipoti, e leai lava se afaina o i ai, e le o saisaitia se isi, po ua ave i ai se faiga faapitoa. Lau Afioga i le Fofoga Fetalai, faapefea ona tatou faapea ua tatou le faia se faiga faapitoa mo le Peresetene o le Faamasinoga o Fanua ma Suafa? O lea ua outou faafofoga i saunoaga i totonu o le Maota lenei, ia tatou alolofa, o le tagata sa tautua i le Malo, o iinei i le Fono Faitulafono, toe tuu atu e faigaluega i o e fesoasoani i ai. O le a la le faauigaina o le mea lea? Ona o le tagata ua tautua i le Fono lenei lea tatou te i ai uma o tatou o faipule, ua tatou ona tatou lagolago i ai ma ave i ai le avanoa e tulaga ese mai ai mai isi tagata lea foi e o latou e saili mai le amiotonu i le Faamasinoga?

O le mea la lena lau Afioga i le Fofoga Fetalai, o le Vaega 15 o le Faavae, ua soli e le Maota lenei o faipule. Ona o le a? Ua tatou aumaia isi mea e faasino i le tagata lea e tulaga ese mai ai ua le mafai ai ona faataunuu taunuuga e masani ona tupu i e ua faasala i soligatulafono faapenei. E tau le faasalaga i le tupe, a o le moliaga lau Afioga i le Fofoga Fetalai, o le faaoolima ogaoga. O le tali foi la a le Maota lenei i le solitulafono lea, ona o le tagata sa tautua iinei i le Maota lenei, e le afaina lona taina o le ulu o le isi tagata. Ma a tilotilo atu foi i faaupuga ia e i ai, a ua ta foi, ua tatau ona ta. O le a la le tuufaafegai o le Tulafono i tagata ua falepuipui, fitu tausaga ua tuu i le soligatulafono lea? Fitu tausaga i le falepuipui, ae fai mai e a le Palemene o Samoa, a ta lava e le Peresetene le ulu o le leoleo po, e tagata. Aisea? Ona e pule. Aisea? Ona o le matai. Aisea? Ona e maualuga atu lona tulaga i lo le tagata lea na faaoolima i ai. Le feau lena o lea e ave i le faaiuga a le tatou Maota pe a tatou mulimulitai i le Lipoti a le Komiti lea.

FOFOGA FETALAI: Ou te fesoasoani atu i le saunoaga a lau Afioga, ona o le saunoaga lea o saunoaga a sui usufono i o latou lava finagalo, ae le o se faaiuga a le Palemene ua faapea ua ioe, o lea e le i maua se tatou faaiuga. A o saunoaga a sui usufono, o lea e faapulusalalau lava, ae faatoa iloa le amiotonu pe a tatou see atu i le tatou palota, ae aua le avea le se ma mea mamafa. E fai silasila foi i te i ua lavea se isi i ou aao o lena e fai ma alu ou aao.

Afioga Hon FIAME NAOMI MATAAFA: Ua a, ua maea le saunoaga i lau Afioga?

FOFOGA FETALAI: Saunoa ia ma malele.

Afioga Hon FIAME NAOMI MATAAFA: Lau Afioga i le Fofoga Fetalai, e i ai foi le tulaga i le tatou vasega o faipule, a faamaonia o tatou soligatulafono i se sala e mafai ona falepuipui ai i le fa tausaga ma sili atu, o i ina lava e aveese ai loa

lou tofi, e le toe agavaa ai loa sui usufono o le Maota o Samoa. O le faasalaga lea, e fitu tausaga, faaoolima ogaoga, ae fai mai e a le Palemene o Samoa? Tatou alolofa i ai, tatou alolofa i ai ona o le tama sa faigaluega i inei. Ua tatou avatu ia Fepuleai le isi advantage, we are conveying to Fepuleai an advantage e le o maua e isi tagata. E sao lea mea?

FOFOGA FETALAI: Malie lau Afioga i le Minisita...

Tofa Lealailepule Rimoni Aiafi: Lau Afioga i le Fofoga Fetalai, o lea e pei e foliga mai ua taaofai e le saunoaga lea sui usufono mamalu uma o le Palemene e faapea o ni matou faamatalaga e toe faaauau Fepuleai ona sa faigaluega i inei. E leai a ma se isi o matou na lauga i lea upu. Ou te le i lauga ai foi lau Afioga. A o lea e pei e foliga mai ua tatou faaauau ia Fepuleai ona sa faigaluega i inei. E ese lava le mea lea na avatu ai lou manatu ma finagalo o sui usufono. Ma lou faaaloalo lava. Leaga o lea e pei e tau pea tau pea pei tatou te faaauau ia Fepuleai, ona sa faigaluega i inei. E leai se manatu faapena na avatu i le tele o sui usufono ma saunoaga sa fai. Ma lou faaaloalo lava.

FOFOGA FETALAI: Malo faafetai. Ia se i tulai mai le Afioga i le Sui Palemia.

Afioga Hon FIAME NAOMI MATAAFA: Lau Afioga, se i aumai pea faamaumauga o saunoaga a le Maota, ona tatou maua ai lea, o lea e i ai le mau lena, ma e le o se mea e natia, o lea e silafia uma e Samoa o Fepuleai na faigaluega i inei. Ioe. A o le mea lea i le Vaega 15, ou te fai atu ma le faaaloalo i lau Afioga ma le Maota, ua le tutusa le tatou faiga lea ua fai i le tofi lea ma isi tagata i totonu o le tatou atunuu.

O le mea mulimuli lau Afioga ona ou te iloa e puupuu le taimi e i ai foi isi o lo o fia saunoa, ou te le iloa i le Komiti po o latou silafia na fai le affidavit po o se tusitusiga faamauina faale-Tulafono e le Afioga ia Fepuleai i le taimi a o lo o faagasolo le Faamasinoga o Toe Iloiloga. Ma o lo o faapea mai lena tusitusiga faatautoina, a faamaonia lana soligatulafono, e faamavae.

O le fesili la lau Afioga i le Taitaifono o le Komiti, sa outou silafia lena mea? A o le a foi le taunuuga faaletulafono o le tagata e fai sana tusitusiga faamauina faaletulafono, faatautoina? O le a le iuga o le tagata e fai le mea lena ae toe solomuli mai ai? Lau Afioga, o le mea lena e tau o le tauto pepelo (prejudice).

FOFOGA FETALAI: Malie lau Afioga i le Sui Palemia ona o lea ua tapa le finagalo ma le Lipoti a le Taitaifono ma le Komiti. Se i tulai mai lau Afioga e faamamaina foi le Komiti e tusa ai ma le saunoaga.

Tofa Nafitoa Talaimanu Ketu: Faafetai tele i lau Afioga i le Nofoa i se avanoa ua toe tuuina mai i le Komiti e fai ai le leo faatauvaa e fai ai se tala a le Komiti e tusa o le faafesili a le sui usufono mamalu. Mo le silafia e lau Afioga ma le mamalu o le Maota, e faapea foi le faafogafoga mai a Samoa, e le i maua e le Komiti. Sa fesiligia i molimau sa afifio mai. Na pau le faamatalaga na oo mai , o le saunoaga lea i le taimi o le Faamasinoga, a o le tulaga i se affidavit, o le agaga

lea ma le faaloalo matou te tulai atu ai i le tulaga lea, o le saunoaga lava i le taimi o le Faamasinoga.

Afioga Hon FIAME NAOMI MATAAFA: Lau Afioga ou te manatu o le a faaiu atu se matou tautalaga ina ia maua ai le avanoa mo sui usufono.

FOFOGA FETALAI: Malo faafetai. Ia malie sui usufono mamalu e a pe a... pei o lea o le a faamaea mai le saunoaga a le Sui Palemia.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai na ona ou fia fesoasoani atu lava i le mataupu lea faamolemole. Leai sa ou manatu ai e avanoa sina faauilavea, ae afai o lou finagalo lea, ona o lea e aumai i le faaiuga a le Faamasinoga le mea tonu lea e saunoa i ai le Afioga i le Sui Palemia. Lea e tusitusi mai e le Faamasino i i i le Fuaiupu 84 o lana faaiuga. Se i silasila ifo i ai le Komiti faamolemole lenei e tau mai ai le affidavit ma le mea lea e saunoa i ai le Sui Palemia.

FOFOGA FETALAI: Ia, o lea ua manino auofala i lea vaega. Faafetai lava fesoasoani mai. Ae se i tulai mai le Sui Palemia e saunoa e faaiu mai lana saunoaga.

Afioga Hon FIAME NAOMI MATAAFA: Lau Afioga e faaiu atu ai se manatu e faapea, ou te toe foi i le lafo a le Malo, ou te toe foi i le manatu autu o lau tautalaga o le pulea faa-le-tulafono. O le pulea o tatou faa-le-tulafono ua i ai o tatou taiala. E le faapea a ua oo mai i le Palemene ona tatala lea e pule tatou po o le a le mea e fai. O tatou o tagata faitulafono, e tatou te nonofo i lalo o le pule a le Tulafono ma e tataua ona tatou faaloaloga le Tulafono.

Lau Afioga e faaiu atu ai, ou te lagolagoina le lafo a le Malo ina ia faamuta le tofiga o le Peresetene o le Faamasinoga o Fanua ma Suafa, ma ou te matua teena le Lipoti a le Komiti, ma e tataua ona toe faafoi lenei Lipoti, aua ne i toe i ai i totonu o faamaumauga a le Palemene, e tauvatea ai le tatou Palemene.

FOFOGA FETALAI: Ia malo saunoa, masalo o lea ua maea sui usufono, se i tuu atu le... masalo o lea ua maea le itu lea, tuu atu i le Minisita. Tulai mai lau Afioga Papalii.

Susuga Hon PAPALIITELE NIKO LEE HANG (Nuu Tu Taulaga i Sasae): Faafetai lava i lau Afioga mo le avanoa. E puupuu foi se taofi ona o le manumanuga i le taimi. Ae e taua lenei avanoa ona o le taua o le mataupu lea i lumamea nei. Sa ou faapea lava au o le tulaga o lenei mataupu na ona aumai e pasia e le Palemene pe teena foi le lafo a le Komiti sa iloilo ina ma suesueina ia le mataupu, ae paga lea ua faatu le lafo o le Malo, ina ia faamalolo le Afioga i le Peresetene.

Lau Afioga e faavae se taofi i mau e tolu na tuuina mai i le lipoti, o le fautuaga lea a le Loia Sili, ma le vaega lea o le Faamasinoga (Judicial Service Committee), ma le faaiuga o le Faamasinoga o le Appeals Court. Ona o le tele o mataupu sa fia talanoa atu i ai ua uma ona saunoa i ai le Afioga i le Sui Palemia ma o le auga foi

lena o se manatu. O le popolega lava o le vaavaai mai o le mamalu o le atunuu, ma atunuu i fafo i iuga o faamasinoga ia ua fai, ae toe aumai i totonu o le Palemene pei ua ese ia se faatalanoaina. Ae ona o le ogaoga o le soligatulafono, lea sa molia i se faaoolima i se tulaga matuia... ae o le isi au fesili lau Afioga i le Fofoga o le Fono, o si ou lava vaivaiga, ou te talitonu e feteenai le iuga ma le fautuaga lea a le Komisi, ma le vaega lea e 68 (5) o le Faavae. O la e manino lava le vaega o le Faavae lea, e tuuina mai pea se faaiuga e fai e le 2/3 o le Palemene. Ae o lea e taua ai mea ia e lua, a molia ma faamaonia e se tuuaiga faaoolima matuia, pei ua le atoatoa foi le malosi, o i ina la ua faaoga ai le Faavae lea, e faauma loa le auunaga.

Ae ona o le taua ia o galuega sa faatino e le Afioga i le Peresetene i le lipoti a le Komiti ma e ou te faatauaina foi le tulaga lea. Ma le isi lau Afioga, ou te talitonu o faasalaga lea ua tuuina atu faasala tupe, ona ua uma, ua iloiloia e le Faamasinoga Appeals (mitigating factors) ua admit lava le Afioga ia Fepuleai o lana solitulafono. Uma foi ona fai le reconciliation, ma le sui lea na aafia i le faaolima a le Afioga a Fepuleai. Ma o i ina la ou te talitonu, o mitigating factors ia, ua mama ai le faasalaga ua faasala tupe. Ao faasalaga o nei soligatulafono, e 7 tausaga i le falepuipui. Ou te talitonu o le avanoa lea na toe iloilo ai e le faamasino o le Faamasinoga o le Apili, ina ia faamama ai se faasalaga ao o le mau a lou nei tagata, ona o lea ua convict.

O le fautuaga foi lea na tuuina mai e le o se Tulafono, e le o se conviction ae faafelea le faatinoina o lana galuega masani, ao lou talitonuga, a molia se tagata i le Tulafono, ua convict especially o le criminal offense. Ae o lea o le a toe talanoa e tatou, e sao ou te lagolagoina foi finagalo faapea ua faamagalo le pagota ma ua... o tatou uma lava e maua le tulaga lea o le alofa, ae o le faatinoga o le amiotonu o le tulaga lena e faigata ia te au ona ou talia le fautuaga lea e faaauau.

With all due respect i le Afioga ia Fepuleai, ona e mafana foi le maua mafutaga, ia ae le fai ai ia le tulaga o Faamasinoga. A le approaching ina la e le Palemene le faaiuga o faamasinoga, aemaise Faamasinoga Maua, ia o fea o le a agai i ai le tatou... Ia o mafaua na ou te teena ai le lipoti a le Komiti, ae ou te talia ia le lafo a le Malo. Ia ma lou faaloalo lava.

FOFOGA FETALAI: Ia malo faafetai, ia ma o lea ua taoto ia le lipoti a le Komiti Suesue Faapitoa a le Palemene i le laulauafono. Ma o lo o tuuina mai ai ana fautuaga ma faamaoniga i le Fono Aoa. Ia o le a amuli se taimi ona faapena lea ona tuuina atu i ai se fesili ma faamaoniga o le lipoti ia ae o lea ua maea ona soalaupule ma tagofia e le paia o le Palemene i ona tulaga uma e pei ona tuuina mai ai ia le latou fautuaga.

E tusa ai ma aiaiga o le mataupu e 68 (5) o le Faavae o le Malo Tutoatasi o Samoa, o le a le aveeseina se Faamasino o le Faamasinoga Sili mai le Tofi vagana ua faia e le Ao o le Malo i luga o le talosaga a le Fono Aoa Faitulafono ua faamaonia e nisi e le itiiti ifo i le 2/3 o le aofaiga o sui usufono o le Palemene e aofia ai ma tulaga avanoa o lo o talosagaina mai ai lona aveeseina mai le tofi i mafuaaga i amioga e le tusa ai ua faatuina mai ai po o le vaivai o le tino po o le mafaua foi.

Ia e ao foi ona faamanino le vaega leni o le aiaiga o le 2/3 o le aofai o sui usufono o le Palemene e aofia ai sui usufono o lo o toesea mai Taulumaga o le

Fono Aoao i le taimi nei e faatino ai lana Palota Tauvalaau. O lona uiga, o le 2/3 o le aofai o sui usufono o le Palemene lona XVI lenei o le Palemene o Samoa e 33 le aofaiga o sui usufono e moomia e faamaonia ai pe teena ai se lafo.

Ia o le mea lea ou te faatonuina ai le Failautusi o le Fono Aoao mo le taina o le logo mo le faailo masani o le Palota Tauvalaau mo sui usufono ao le i tuuina atu ia le tatou fesili e faaiu ai lenei mataupu.

Susuga Hon Tuilaepa Auelua Fatialofa Lupesoliai Lolofietele Neiotti Aiono Galumalemana Dr. Sailele Malielegaoui: Lau Afioga i le Fofoga Fetalai...

FOFOGA FETALAI: Se i tulai mai le Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neiotti Aiono Galumalemana Dr. Sailele Malielegaoui: Ae e le i aumaia le fesili ina ia manino, a 2/3 i le aofaiga e 50, o lona uiga e 33 ma le fasi sui usufono e toatasi. Ou te leiloa pe i ai se fasi sui usufono i i. Ae e tatau ona tatou round off i le 34 ia ona faatoa atoa lea. E na o sina fesoasoani atu leaga e leai se fasi sui usufono o i ai nei.

FOFOGA FETALAI: Malo, faafetai, ia ona o lau Afioga o le Taitai o le Maota, e i ai lou manatu ua e faamanatuina le tulaga lea, ina ia faapena ona mauu ai faaiuga o le tatou... Lau Susuga i le Failautusi e 34, autu loa e pei ona saunoa mai le Taitai o le Maota.

Ia o le tatou fesili e lelei ona faautagia mai, faautagia mai i le tuuina atu o le fesili, ina ia see le sa o le Afioga i le sui usufono ia faapena ona manino ia le itu o lo o faapena ona ave i ai ia lou finagalo.

FESILI: O sui usufono uma e lagolagoina le Lafo a le Afioga i le Palemia, ina ia faamalolo le Peresetene o Fanua ma Suafa ona o tulaga o amioga le talafeagai ma Faiga Faavae o moliaga ua faamaonia, faamolemole se i tutulai mai.

PALOTA TAUVALAAU

1. Susuga Hon Tuilaepa Auelua Fatialofa Lupesoliai Lolofietele Neiotti Aiono Galumalemana Dr. Sailele Malielegaoui.
2. Afioga Hon Fiamē Naomi Mataafa.
3. Afioga Hon Tuitama Talalelei Tuitama.
4. Afioga Hon Sala Fata Pinati.
5. Susuga Hon Papaliitele Niko Lee Hang.
6. Tofa Hon Faimalotoa Kika Iemaima Stowers.
7. Afioga Hon Sili Epa Tuioti.
8. Afioga Hon Loau Sola Keneti Sio.
9. Afioga Hon Afamasaga Lepuiai Rico Tupai.
10. Afioga Hon Laauli Polataivao Leuatea.
11. Afioga Afoa Amituanai Faleulu Maui.

12. Afioga Toomata Aki Tuipea.
13. Tofa Hon Lauofo Fonotoe Nuafesili Pierre Lauofo.
14. Afioga Taefu Lemi.
15. Afioga Amituanai Fagaivalu Kenrick Samu.
16. Susuga Seiuli Ueligitone Seiuli.
17. Tofa Hon Faasootauloa Pati Taulapapa.
18. Afioga Tofa Foleni Tama Galu.
19. Tofa Lenatai Victor Faafai Tamapua.
20. Afioga Faalogo Iosefa Sopi.
21. Afioga Faumuina Asi Pauli Wayne Fong.

O sui usufono na lagolagoina le Lafo a le Malo ó 21.

FESILI: O sui usufono uma e teena le Lafo ae ia toe faaauau le tofiga o le Peresetene o Fanua ma Suafa se i tutulai mai.

1. Afioga Hon Faaolesa Katopau Ainuu.
2. Afioga Hon Tialavea Fea Leniu Tionisio Hunt
3. Afioga Tapulesatele Mauteni Tamasone Metuli II Esera.
4. Afioga Hon Gatoloaifaana Amataga Alesana Gidlow.
5. Afioga Tafua Maluelue Tafua.
6. Afioga Hon Faumuina Tiatia Faaolatane Liuga.
7. Afioga Hon Aeau Peniamina Leavaiseeta.
8. Afioga Tuifaasisina Misa Lisati Leleisiuao Palemene.
9. Afioga Salausa John Ah Ching.
10. Susuga Mulipola Leiataua Laki.
11. Tofa Sooalo Umi Feo Mene.
12. Tofa Lealailepule Rimoni Aiafi.
13. Afioga Sulamanaia Fetaiai Tauiliili Tuivasa.
14. Afioga Fuimaono Teo Samuelu Teo.
15. Afioga Leaana Ronnie Posini.
16. Tofa Aumua Isaia Lameko.
17. Afioga Toleafoa Ken Vaafusuaga Poutoa.
18. Tofa Nafaitoa Talaimanu Ketu.

O sui usufono na teena le Lafo a le Malo - 18

FOFOGA FETALAI: Malo faafetai. O le iuga leni o le Palota Tauvalaau, o le aofai o sui usufono na lagolagoina le lafo a le Malo, ina ia faamalolo le Peresetene o Fanua ma Suafa ona o tulaga o amioga le talafeagai ma faiga faavae i moliaga ua faamaonia e 21.

O le aofai o sui usufono na teena le lafo, a ia toe faaauau le tofiga o le Peresetene o Fanua ma Suafa, e 18.

E talu ai ona ua ausia le 2/3 o le aofaiga o sui usufono e mafai ai ona aveesea le tofiga o le faamasino e tusa ai ma aiaiga o le mataupu 68(5) o le Faavae o le Malo

Tutoatasi o Samoa. Ou te faasilasila aloaia atu ai i lenei Palemene ua aveesea nei le tofiga o le Peresetene o le Faamasinoga o Fanua ma Suafa, e pei onafai .

Afioga Tafua Maluelue Tafua (Aleipata Itupa i Lalo): Lau Afioga i le Fofoga Fetalai, o le mea e fia faasao. E le i ausia...

FOFOGA FETALAI: Ou te muai faamalulu atu ona talu ai, ua tele pepa ua tuuina mai e le Failautusi, ua le iloga se pepa... O uiga lava ia o le soifuaga o le sese, e pei lava o le upu a Iesu i le fafine e togi se maa pe a i ai se isi e leai se sese.

O le faaiuga la lea, talu ai e le i ausia le 2/3 o le aofaiga o sui usufono e mafai ai ona aveesea le tofiga o le Peresetene o le Faamasinoga o Fanua ma Suafa e tusa ai ma aiaiga o le mataupu 68(5) o le Malo Tutoatasi o Samoa, ou te faasilasila aloaia atu i lenei Palemene, ua toe faaauau nei le tofiga o le Peresetene o le Faamasinoga o Fanua ma Suafa e pei ona umia e Fepuleai Letufuga Atilla M.Ropati. O le faaiuga lena, ua toe faaauau le galuega ma le tofiga o le Peresetene o Faamasinoga o Fanua ma Suafa.

Ou te faamalulu atu i le Palemene ua potopoto, aemaise le faafofoga mai a Samoa i le faaletonu o le matou faamatalaga e pei ona tuuina atu muamua. A o lea ua matou avatuina le faasaoga e pei ona i ai le faaiuga o le Faiga Palota e tusa ai o le galuega e le faigofie, sa alofaiva i ai le Palemene e ala i saunoaga ma felafolafoaiga, e faapea foi le alo atu i lana Palota Tauvalaau.

Ma lou faaloalo ou te tapa lau Afioga i le Palemia mo sau saunoaga.

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai, faamalo atu i le Maota nei, e le faigofie le faaiuga ua taunuu i ai le Maota. A o le faaaliga lea o le finagalo fulisia o le Palemene, o le temokarasi lena. O lea o lo o faavae ai le tatou Malo. Ua uia foi le ala o mea, i le tulaga o aiaiga o le Faavae. O le a lava la le iuga ua tatou taunuu i ai, o le iuga na mulimulitaia ai le Faavae. E na o le Atua na te faamasino, ou te manatua i le taimi lenei ia le onoselau ma le tolu afe, le aofia o tagata Isaraelu na aveese mai e Mose. O lona uso o Arona o le uluai ositaulaga na tofia e le Atua. I lena onoselau ma le tolu afe, na o le toalua tagata na taunuu i le nuu paia. E na o le toalua lava, o Iosua le isi, na o le toalua lava na tu laueleele ae faataamilomilo lava e le Atua i le toafa i le fasefulu tausaga. Ae faapefea Mose o le taitai na filifilia? Na faapefea lona uso o Arona o le ositaulaga? O laua ia na faalagolago i ai le nuu, taitaina o le amiotonu. Ae na ona faatonu lava e le Atua ia Mose e ta le papa, ae puna ae le masalosalo, sala ma Mose, sala ma Arona faapena mea o iuga faigata, e faia e le Atua, o iuga o le amiotonu e le faigofie.

O le isi lenei iuga e tumati'a i faamaumauga a le Palemene o Samoa. O lea lava ua alofaiva le Maota lenei, e faatino le faautautaga tataua a le sui usufono. E tele mea tatou te eseese ai, e pei lava ona faafogafoga i le avatu o le lafo a le Malo. E le i faatafa lava le Malo i le avatuga o le lafo, i le talitonuga foi o le mea e tataua ona fai. A o lea ua fai le faaiuga a le Palemene, lau Afioga i le Fofoga Fetalai, o le faaiuga lena. O le faaiuga lena e aloaia leaga ua fai i ai le faaiuga a taitai o le atunuu lenei. O le a lava le tulaga, ao le faaiuga lena e tumau e faavavau.

Lau Afioga i le Fofoga Fetalai, ou te faafetai i lau Afioga i lou taumafai mai e faatonutonu le faagasologa e le faigofie. Ua uma foi ona fai tiute, faatino tiute o i latou o sui usufono mo itumalo, o le latou lea talitonuga ma le latou faamasinoga. E tele isi teuteuga e ono tulai mai, ua avea le mataupu lenei, ua oo ai foi mafauauga i le tulaga e tatau ai ona toe teuteu le Faavae, aemaise lava le faaiuga lea ua tatou taunuu i ai, ona e le o manino ai i ina le Faavae. E na o le pau lava le mea lea e aumai e le Faavae, momotu le tautua uma. Ae a momotu, ae afai la e le taunuu le faamoemoe ua pau le lafo, o le a le isi mea e sosoo ai? O le isi mea e sosoo ai, o le toe faaauau. O le tulaga lena, o le itu tonu lena o lea e gugu ai le Faavae o le Malo. A o upu a le atunuu lenei, "e aoga mea tutupu e maua ai mafauauga lelei", mo le taitaina o le tatou Malo i le agai atu i le lumanai.

O le faafetai, o le faafetai ia outou Afioga ua faaaaogagase ona o lenei iuga o se iuga e mamafatu ia i tatou uma. A o le faamasinoga lava a le amiotonu a le tagata lava ia, lea ua taunuu ai le Maota i lana faaiuga i le aso. Lau Afioga i le Fofoga Fetalai, o le faafetai lea, o le tatalo ia fesoasoani mai le Atua i le Maota lenei, ia faaosofia moegaluaga ia maua pea le tofa fetala'i e limataitaina ai a outou Afioga. O tupu ma ee o Samoa ua tofofi mo le taitaina o le tatou atunuu.

Lau Afioga i le Fofoga Fetalai o le lafo, *Ina ia tolopoina nei le Fonotaga a le Fono Aoaofaitulafono seia aulia le aso 8 o Oketopa 2019.*

FOFOGA FETALAI: Malo faafetai.

Faaluaina e le Sui Palemia.

Na faamaonia le lafo.

FOFOGA FETALAI: Ua manatu ua lava ma totoe le saunoaga a le Palemia, e saunoa e palelaei ai le faaiuga ua taunuu i ai lenei mataupu e le i faigofie. Amuia foi o tatou taimi ua tatou faafeagai ma mataupu ogaoga faapenei, ae so o se mea e faigata e faamoemoe i le Atua e fesoasoani mai. E aumai mafauauga lelei, e aumai foi manatu lelei e faapena ona tatou taunuu ai i se taunuuga aupito sili ona lelei, e tusa ai o le finagalo o le Atua.

Ua saunoa foi le Palemia e faafetaia le usufono ma lee faapena foi ona oo i ai se lagona. Malo galulue, malo usufono e le faigofie lenei lua i le tolu vaiaso ua tatou savalia. E le gata i le Palemene ae faapea foi Ofisa Sili o Pulega a Matagaluega a le Malo aemaise o auaunaga uma o lo o faapena ona aafia ma tofu sao i le faatinoga o le galuega a le Fono Aoaofaitulafono, e faapea foi i le Failautusi ma le ofisa o le Fono Aoaofaitulafono. Aemaise foi o le tapuaiga a Samoa, malo le tapuai. O lau Palemene e faalagolago i le Atua mea uma. O le a foi se upu ua faapena ona le tauga malie i le faafofoga, pe paopapa foi se manatu. E i ai lava le faamoemoe e faalagolago i le Atua e ui magalo ai sa matou faamatalaga. O le naunautaiga o le faamoemoe ma le lagona tatou maua measili, e a le tapuaiga ma le lumanai manuia o Samoa.

Avea foi lenei avanoa leaga o lea o le a tatou o atu i le la vaiaso fou mo le faatinoga o le tatou taligamalo aua taaloga a le Pasefika. Ia alofagia e le Atua, o le tagata lava e fuafua ma tapena ma saili, ao le faiva alofilima o le Matai i le Lagi o le faataunuuina o tatou faamoemoega. Tatou faamoemoe i le Atua ia faapena ona

ufitia i ona aao agalelei, malupuipua le soifua ma le ola ma faamanuia i le au taaalo a lo tatou atunuu. Ina ia faapena ona faaiuina taaloga i le manuia, foi le viiga i le Atua.

O le matou faamatalaga lea, e tusa ai o le faaiuina o le tatou Fonotaga i leni aoauli. Ou te faasilasila atu o lo o i ai faguvai a sui usufono. E tauala mai ia lea fuafuaga i le sui Palemia ma le Matagaluega o Punaoa Faale-natura ma le Siosiomaga, e uunaia ai le tausia lelei o le siosiomaga, i le atigifagu e faapea foi le tulaga e pei ona tapenaina. Malo faafetai, ia faapena pea na faatupulaia ia le tulaga o le galueaina o atinae lelei aua le soifua manuia o le atunuu.

Ae tatou te le i tolopo ou te tapa lou uso le Afioga i le sui Fofoga Fetalai, malie ia e te faaiuina mai.....leaga o le ta taimi lava leni ua ta taaalo ai i le aso leni. Saunoa ia e faaiu mai la tatou Fonotaga i se tatalo.

Na tolopo Taualumaga a le Fono Aoaofaitulafono i le itula e 1.56 i le afiafi seia aulia le itula e 9.00 i le taeao o le Aso Lua, 8 Oketopa 2019.